

TUTÚ CÚÚ ÒÚ NÍ CADÚ_{HA} TÉ PÄBLÚ QUIHIⁿ NDAHA ÑÁYIU ÑUÚ CÒRINTÚ

Té Păblú cādŭha-dé tutú quihiⁿ ndaha ñáyiu xĩndecu ichi Xítóhó Jesucrístú ndécú ñuú Còrintú

¹ Yúhú té Păblú cáháⁿ-í tnúhu Xítóhó Jesucrístú chi ducaⁿ ñĩ cachí Yă Ndiǒxí cunduu. Te cādúha-í tutú-a ndihí té Timùteú té ndècu ndihí-o ichi-gá cuendá daquixi-í ndaha nchòhó ñáyiu xĩndecu ichi Yă Ndiǒxí ndécú ñuú Còrintú, te tutú-a cuu-xi tnàhá cuendá nchaa ñáyiu cùu cuendá Yă Ndiǒxí xĩndecu nchaa ñuú yĩndèhu distritú Acăyá. ² Te xicáⁿ táhù-í núú Tătá-ó Dútú Ndiǒxí ndihí núú Xítóhó Jesucrístú sá ïo na chĩndee chitúu ñaha-gă xii-ndo, te ñiu-ni ndi ndúú-gá ná càda te ío váha cuu iní-ndó cùndecu-ndo.

Té Păblú cáháⁿ-dé nchaa nàcuáa ndòho-dé

³ Te chí ná cächí-ó sã ïo váha iní Dútú Ndiǒxí Yaá cúú Tătá Xítóhó Jesucrístú, te ñiu-ni Dútú Ndiǒxí cúú-gă Yaá ío cùndahú iní ñáhá xii-o, te ñiu-ni-gá cúú-gă Yaá táxí tnúhu ndee iní. ⁴ Te cuèi nándi ndòho-o ndecu-o dico ñiu-ni Dútú Ndiǒxí táxí-gă tnúhu ndee iní xii-o, te ducaⁿ quide-gá cuendá sá nchóó cuñaha-o tnúhu ndee iní xii nchaa ñáyiu nándi ndòho ndecu, te ñiu-ni nchaa tnúhu ndee iní táxí-gă xii-o ñiu-ni nchaa tnúhu ndee iní-áⁿ cuñaha-o xii-yu. ⁵ Te Xítóhó Jesucrístú ío ní ndoho-gá, te ducaⁿ nchòo tucu ío

ndòho-o, te ducaⁿ ìo vài tnúhu ndee ìní nìhí-ó ndècu ndìhi-o chi ndècu-o ndìhi Xítóhó Jesucrìstú. ⁶ Te nchúhú nándi ndòho-ndí ndécú-ndí cuèndá sá nchòhó nìhí-ndó tnúhu ndee ìní cundecu ndìhi-ndo te naníhí tàhú-ndó. Te Yá Ndiöxí táxí-gã tnúhu ndee ìní xii-ndí, te ducaⁿ quide-gá cuèndá sá nchòhó tnàhá-ndó nìhí-ndó tnúhu ndee ìní-áⁿ te naníhí tàhú-ndó, te ducaⁿ càda ndee cada cahnu ìní-ndó ndòho-ndo datná ndóhó nchùhú. ⁷ Te nchúhú ìo váha sàni ndáá ìní-ndí cuèndá-ndó chi ndòho-ndo datná ndóhó-ndí, te ducaⁿ tàxi Yá Ndiöxí tnúhu ndee ìní xii-ndo dàtná táxí-gã xii-ndí.

⁸ Te nchòhó ñáyiu ndècu ndìhi-ndí ichi Xítóhó Jesucrìstú cuíni-ndí cachí tnúhu-ndí xii-ndo nàcuáa ní yáha-ndí cútnàhá ní xíndecu-ndí distritú Àsiá chi dàvá-áⁿ ìo ní ndoho-ndí, te luha-ná te vá cùndèe ìní-ndí yáha-ndí nchaa tnúndòho-áⁿ ní cùu chi ní xehndé ìní-ndí sá vǎ cǎcu-ndí. ⁹ Chi ní sani ìní-ndí sá ndíyi-ná cuu-ndí ní cùu, te ducaⁿ ñí yáha-ndí cuèndá sá ìo-gá quíndáá ìní-ndí Yá Ndiöxí sá díú-gã taunihnu ñaha-gã xii-ndí, te ñá díú mèe-ndí tau-nihnu-ndí méé-ndí, te ñíu-gá cúú-gã Yaá dándòto cuéi ñáyiu sa ní xíhí. ¹⁰ Te ñíu-ni-gá ní taunihnu ñaha-gã ñá túú ní sàhni ñaha ñáyiu xii-ndí, te ñíu-ni-gá táúnihnu ñaha-gá xii-ndí cuéi vitna, te cùtnuní ndáá ìní-ndí sá díú-ní-gã taunihnu ñaha-gã xii-ndí núú cuàháⁿ núú vǎxi te vá cáhni ñaha ñáyiu. ¹¹ Te nchòhó tnàhá-ndó chìndee ñaha-ndo xii-ndí chi càháⁿ ndìhi-ndo Yá Ndiöxí cuèndá-ndí, te ìo vài ñáyiu càháⁿ ndìhi ñàhá-yu xii-gá cuèndá-ndí, te ducaⁿ ìo vài ñáyiu ndàcáⁿ táhù-yu núú-gã cuèndá

nchaa sá vǎha quǐde ñaha-gá xii-ndí.

Té Pǎblú càháⁿ-dé ná cuèndá ñá túú ní nàyáha-dé ñúú Còrintú

¹² Te ío váha cùu iní-ndí chi cùtnuní iní-ndí sá cúú-ndí cue tée cùu ndáá dàtná cuìní Yǎ Ndiǒxí cunduu ndècu-ndí ñuyíú-a, te diu-ni ducaⁿ quǐde-ndí sá cúú-xí-ndó chi mee-gǎ cúndàhú iní ñáhá-gǎ xii-ndí chíndèe ñaha-gá, te ñá túú quǐde-ndí dàtná sání iní cue ñáyiu ñuyíú-a. ¹³⁻¹⁴ Nchaa nàcuáa ndùu tnúhu chido tnuní-ndí dáquixi-ndí ndaha-ndo cùu-xi mee-ni tnúhu sá ñà túú úhú tecú tnùní-ndó, Te nchòhó sa cùtnuní luha iní-ndó nàcuáa quǐde-ndí ndécú-ndí, te cuìní-ndí sá ío-gá váha tecú tnùní-ndó cuèndá sá òré ná quǐxi tucu Xítóhó Jesucrístú, te dàvá-áⁿ ío cada nínu ñaha-ndo xii-ndí dàtná cada nínu ñaha-ndí xii-ndo. ¹⁵ Te cuèndá xíáⁿ núu ní sani iní-í yáha càháⁿ-í úú xito núú ndécú-ndó cuèndá ío cudíí iní-ndó. ¹⁶ Chi ní sani iní-í sá òré quíhíⁿ-í distritú Macèdoniá te yáha càháⁿ-í núú ndécú-ndó, te òré ndixi tucu-í te nayáha càháⁿ tucu-í, te òré nayáha càháⁿ-í te taxi-ndo sǎ cúú ìchi-í cuèndá quíhíⁿ-í distritú Jùdeá, duha ní sani iní-í ní cùu. ¹⁷ Te sá dúcáⁿ ñà túú ní quǐxi coto ñaha-í xii-ndo te cudana sáni iní-ndó sǎ yǔhú ñá túú ní sǎha váha-í cuèndá nàcuáa ní sani iní-í cada-í, àdi cudana ñáyiu ndècu ichi cuehé ichi duha, chi cue ñáyiu-áⁿ tnaa càchí-yu sá cúú càdá-yu ìⁿ sá sání iní-yu cadá-yu te tnaa càchí-yu sá ñǎhá. ¹⁸ Dico Yá Ndiǒxí Yáá ío váha quǐde ndáá nàha ndáá náhá càxi-gá sá nchǔhú ñá túú dàma-ndí sá càháⁿ-ndí. ¹⁹ Te yúhú ndíhí té Sìlvanú ndíhí té Timùteú dánèhé

ñáhá-ndǐ xii-ndo cuendá Xítohó Jesucristú Yaá cúu Dêhe Yá Ndiöxí, te Xítohó Jesucristú cúu-gã Yaá ñá túú dàma-gá tnúhu càháⁿ-gá, chi cùu-gá Yaá càháⁿ mee-ni tnúhu ndáá tnúhu cuiti. ²⁰ Te ñu-ni Xítohó Jesucristú cúu-gã Yaá quidé nchàa nacuáa ní cachí Yá Ndiöxí. Te sá cuendá sá dúcáⁿ quide Xítohó Jesucristú xiáⁿ càchí-ó sã ïo càhnu cuu Yá Ndiöxí. Te nchaa-o na càchí-ó sã díú-ní dùcaⁿ na cada-gá. ²¹ Te mee Yá Ndiöxí quidé-gã ndécú-ní-ó ìchi Xítohó Jesucristú. Te ñu-ni mee-gã ní cáháⁿ ñáhá-gã xii-o cuendá cunu cuechi-o nũú-gã. ²² Te Yá Ndiöxí ní quide-gá sá nchóó cùu-o ñáyiú cùu cuendá-gá, te ní taxi-gá Espiritú-gá ní ngúndecu ndíhi-o cuendá cutnùní iní-ó sã ndáa cada ñaha-gã xii-o nàcuáa ní cachí-gá cada-gá.

²³ Te Yá Ndiöxí náhá-gã sá yùhú càháⁿ ndáá-í ná cuendá vátá quixí-gã-í quixi coto ñaha-í xii-ndo, te vátá quixí-gã-í chi ñá túú cuìní-í dandìhú-í iní-ndó. ²⁴ Te nchúhú ñá túú tàú-ndí cada yica ñaha-ndí xii-ndo nàcuáa quíndáa iní-ndó Yá Ndiöxí, chi sa sàndáa váha iní-ndó-gã, chi nchúhú cuìní-ndí chindee tnúhu ñaha-ndǐ xii-ndo nàcuáa ío-gá cudíí ìní-ndó cùndecu-ndo.

2

¹ Te ní sani ndáa iní-í sá vã quixí ndíhi-ni-í quixi coto ñaha-í xii-ndo cuendá sá vã dándìhú-í iní-ndó. ² Te nchòhó cúu-ndó ñáyiú tàxi tnúhu ndee ìní xii-í cúdíí ìní-í ndécù-í, te xiáⁿ nũu ñá túú cuìní-í dandìhú-í iní-ndó, chi núu ducaⁿ na càda-í te vá cùndècu váha-gá iní-ndó nàcuáa taxi-ndo tnúhu ndee ìní xii-í. ³ Te xiáⁿ nũu ní tendaha-í tutú véxi

ndaha-ndo cuendá sá òré quixi coto ñaha-ĩ xii-ndo, te dàvá-áⁿ quini-í sá quidé-ndó nàcuáa cudíí ìní-í te ñá díú dà dandihú-ndó ìní-í òré quexìo-í, chi nchòhó tàú-ndó càda-ndo sá yũhú cudíí ìní-í. Te cùtnuní ndáá ìní-í sá nõu yúhú cudíí ìní-í te tnàhá nchòhó cudíí ìní-ndó cuendá sá dúcáⁿ cùdíí ìní-í. ⁴ Te ndàhyú-í sá ndihú ìní-í òré ní cadúha-í tutú ní dáquíxì-í ndaha-ndo, chi ío cuéhé sã sání ìní-í, te ñá túú ní dàquixi-í tutú-áⁿ ndaha-ndo cuendá sá dándihú ìní ñáhà-í xii-ndo, chi ní dáquíxì-í cuendá sá nchòhó cutnùní ìní-ndó sã ïo cùu ìní ñáhà-í xii-ndo.

Nàcuáa tàú ñáyiu ñúú Còrintú cadá-yu cuendá ìⁿ ñáyiu ñá túú quide ndáá

⁵ Te na càchí tnúhu-í xii-ndo cuendá ìⁿ téé ní quide ìⁿ sá ñà túú tàú-dé cada-dé ndécú ndìhi-ndo, te ní quide ndàhú-xi luha ìní-í cuendá sá ñí quide-dé-áⁿ dico nchòhó tnàhá-ndó ní dándihú-dé luha ìní-ndó, te duha càchí-í sá lúhá-ní ñí dándihú-dé ìní-ndó cuendá sá vã cuidó-gá-í ná tnúhu cáháⁿ-í. ⁶ Te nàcuáa ní ndatnúhu-ndo ñí quide ndáá-ndó cuèchi téé-áⁿ te sa ndói-gá cuu nàcuáa ní quide-ndo-dě. ⁷ Te vitna tàú-ndó càda cahnu ìní-ndó sã ñí quide-dé, te cuáñaha-ndo tnũhu ndee ìní xii-dé chi núu ñáhá te vá ñihí ndée-gã-dé cada-dé sá vãha cuendá sá ndihú ìní-dé. ⁸ Te xíáⁿ nõu càháⁿ ndàhú-í núú-ndó sã cadá tùcu-ndo sá cúú ìní-ndó-dě. ⁹ Te ñu-ni cuendá iha càháⁿ-í ìⁿ núú tùtú sá sà ní dáquíxì-í ndaha-ndo, te ducaⁿ ñí quide-í xító ndèè ñáhà-í xii-ndo nõu ndisa cuìní-ndó càda-ndo nchaa nacuáa càháⁿ-í. ¹⁰ Te nděda-ni càa ñáyiu na càda cahnu ìní-ndó

ɨ̃n sá quídě-yu, te tnàhá yúhú cada càhnu iní-í sá quídě-yu tucu. Te núu ió ɨ̃n sá xíní ñùhu-xi cada cahnu iní-í te quide cahnu iní-í, te mee Xítóhó Jesucristú nàhá-gă sá dúcáⁿ quide-í, te ducaⁿ quide-í cuendá sá nchòhó cuu-xi sá vǎha xii-ndo. ¹¹ Te ducaⁿ te sácuíhná vǎ nihí-xi ná cada ñaha-xi xii-o, chi nchoo sà xini-ó nàcuáa quide-xi.

Té Pǎblú ndìhú iní-dé ndécú-dě ñuú Tròás

¹² Te ní xica-í cuáháⁿ-í ñuú Tròás cuendá yàcáⁿ cáháⁿ-í tnúhu sá càháⁿ nàcuáa naníhí tǎhú-ó tnúhu Xítóhó Jesucristú, te òré ní quexiò-í te ní níhí-í ɨ̃n ichi càhnu cáháⁿ-í tnúhu-gá. ¹³ Dico ñá túú ní cùu váha iní-í chi ñá túú ní nàníhí-í té Títú té ndècu ndìhi-o ichi Xítóhó Jesucristú, núu xǎⁿ ní quide ndee ìní tnáhà-í ndìhi cue ñáyiú ñuú-áⁿ, te ní xica-í cuáháⁿ-í distrítú Macèdoniá.

Dàquetìhú-ó yùcu ñávǎha chi ndècu ndìhi-o Xítóhó Jesucristú

¹⁴ Te táxǎhu xii Yá Ndiǒxí chi ducaⁿ-ni sànu ichi ñaha-gá xii-ndí nàcuáa cunuu-ndí núu yucu ñávǎha chi ndècu ndìhi-ndí Xítóhó Jesucristú, te mee Yǎ Ndiǒxí sáchiuⁿ ñaha-gá xii-ndí càháⁿ-ndí tnúhu-gá. Te cada iní-ó sǎ tnúhu-gá-áⁿ cúu-xí dàtná ɨ̃n yúcu sǎ ïo váha sàháⁿ te ta xítènuu dicó-xi ndèni ní cuu cuáháⁿ. Te ducaⁿ sǎtnahá-xi cùu tnúhu-gá chi nchúhú quidé-ndí nàcuáa ta xítènuu ndèni ní cuu cuáháⁿ. ¹⁵ Te cùu-ndí dàtná dicó ɨ̃n yúcu sǎ ïo váha sàháⁿ, te nàcani cuendá Xítóhó Jesucristú núu Yǎ Ndiǒxí, te dicó yúcu-áⁿ nchítá cuèi núu xǎndecu cue ñáyiú sa ní naníhí tǎhú, te cuèi núu xǎndecu cue ñáyiú ta xǎta nihnu cuáháⁿ. ¹⁶ Te sá cúu-xí cuè ñáyiú ta xǎta nihnu cuáháⁿ-áⁿ, dicó

yú-cú-ǎⁿ cúú-xí dàtná ìⁿ sá sáhní ñàha xii-yu, dico sá cúú-xí cuè ñáyiú sa ní naníhí tàhú, dicó yú-cú-ǎⁿ cúú-xí dàtná ìⁿ sá ndécá ìní-yu, ducaⁿ sãtnahá-xi cùu nchúhú. Te vitna chí cuãha cuendá nõu ná cúú ñáyiú sãni ìní-ndó ndàcu cada nacuaa ndùu tnúhu càháⁿ-í-a. ¹⁷ Chi nchúhú càháⁿ-ndí tnúhu Yá Ndiõxí dico ñá túú ndáhú quidé-ndí ndihí tnúhu-gá dàtná xĩquide dava-gá-güedé, chi quide ndáá-ndí càháⁿ-ndí tnúhu-gá, te mee-gã ní cachí-gá sá dúcáⁿ càda-ndí te ndèhe-gá sá nchúhú quidé-ndí nàcuáa ní cachí-gá, chi ndècu ndihí-ndí Xítóhó Jesucrìstú.

3

Cuendá ìngá núú sã vãha ní cachí Yã Ndiõxí cada-gá ñáyiú

¹ Te cuèi duha càháⁿ-ndí núú-ndó dico ñá túú xìni ñuhu-xi sá cũñaha-ndí xii-ndo sã cúú-ndí cue téé quide váha, te ni ñà túú xìni ñuhu-xi cacanehe-ndí ìⁿ tutú núú càháⁿ-xi sá cúú-ndí cue téé váha danèhé ñáhá xì-ndo datná xĩquide dava-gá-güedé, te ni ñà túú xìni ñuhu-xi sá nchòhó taxí-ndo ìⁿ tutú núú càháⁿ-ndó sã nchúhú cúú-ndí cue téé quide váha. ² Te ñá túú xìni ñuhu-xi ducaⁿ cada-ndí. Te cùtnuní ndáá ìní-ndí sá nchòhó cúú-ndó dàtná ìⁿ tutú sá ìo váha càháⁿ cuendá-ndí. Te ducaⁿ sãtnahá-xi cùu-ndo chí nchaa ñáyiú ñihí-yu tnúhu nàcuáa quide-ndo ndecu-ndo, te xĩãⁿ cùtnuní ìní-yu sá nchúhú cúú-ndí cue téé quide váha. ³ Te nchòhó cúú-ndó cuendá Xítóhó Jesucrìstú, te cùu-ndo datná tutú-gá te tutú-áⁿ ñí táúchíúⁿ-gã xii-ndí ní cadúha-ndí, te mee-ni ndihí Espíritú Yã Ndiõxí ní

ngúndeé tnúhu-áⁿ te ñá díú ndìhi tindá ní ngúndeé. Te ñá díú ìⁿ núú yúú ní ngúndeé chi iní-ndó cùu-xi núú dúcáⁿ ñí ngúndeé tnúhu-áⁿ te ducaⁿ sãtnahá-xi cùu-ndo.

⁴ Te duha càháⁿ-ndí chi cùtnuní ndáá iní-ndí sá Yă Ndiöxí quidé vâha ñaha-gă xii-ndí, chi ndècu ndìhi-ndí Xítóhó Jesucristú. ⁵ Te nchúhú chi ndàcu-ndí quidé-ndí sá vâha dico ñá díú mèe-ndí ducaⁿ ndàcu-ndí quidé-ndí, chi mee Yă Ndiöxí chíndèe ñaha-gă xii-ndí nũu ndàcu-ndí quidé-ndí sá vâha. ⁶ Te mee Yă Ndiöxí ní quide-gă sá nchúhú ndacu-ndí cunu cuechi-ndí núú-gă cáháⁿ-ndí núú ñâyiu cuendá ingá núú sã vâha ní cachí-gă cada ñaha-gă xií-yu. Te sá vâha ní cachí-gă cada ñaha-gă xií-yu-áⁿ ñà túú ìⁿ-ni cuu-xi ndìhi nchaa tnúhu sá ñí xâhaⁿ-gă xii ndíi Moisés ní chídó tnùní ndíi, te ducaⁿ chí espíritú Yă Ndiöxí néhé chiúⁿ-xi nchaa tnúhu sá càháⁿ cuendá nchaa sá vâha-áⁿ. Te nchaa tnúhu ní chídó tnùní ndíi Moisés, dándixi túu-xi iní nchaa ñâyiu ndècu ndìhi tnúhu-áⁿ sã cuíta ni-hnú-yu cuendá nchaa cuéchi-yu, dico cue ñâyiu ndècu ndìhi Espíritú Yă Ndiöxí ñâyiu-áⁿ ndécú ndìhí-yu tnúhu ndee iní sá cãcu nihnú-yu.

⁷ Te tnúhu sá ñí cáháⁿ Yă Ndiöxí ndéé díhña nàcuáa cada ñâyiu ní ngúndeé-xi ìⁿ núú yúú quèhéⁿ. Te òré ní dátũu ndíi Moisés nàcuáa càháⁿ tnúhu sá ñí cáháⁿ Yă Ndiöxí ndèé núú yúú-áⁿ nũu cuè ñâyiu isráel, te súúní ñí tásaⁿ núú ndíi te ñá túú-gă ní cùu cundehé-yu núú ndíi, te ducaⁿ-gă ducaⁿ-gă quidé-xi dátásaⁿ-xi núú ndíi ni cùu ñá túú-gă ducaⁿ ni quide-xi. Te tnúhu ndéé núú yúú-áⁿ dándixi túu-xi iní cue ñâyiu sá cuíta ni-

hnú-yu sá cuèndá nchaa cuéchi-yu, te ío váha ní quide-xi cútnàhá ní ngúndecu ndihi cue ñáyiú isràél tnúhu-án. ⁸ Te sá dúcán ñí quide-xi xíán cútnùní sá tnúhu càháⁿ Espiritú Yá Ndiõxí vitna uuⁿ-gá ducaⁿ ño-gá váha quide-xi. ⁹ Te núu ducaⁿ ño váha ní quide-xi cútnàhá ní ngúndecu ndihi cue ñáyiú isràél tnúhu sá dándixi túu iní-yu sá cuíta nihnú-yu sá cuèndá nchaa cuéchi-yu, te uuⁿ-gá ducaⁿ vâha quide-xi vitna ní ngúndecu ndihi-o tnúhu sá càháⁿ nâcuáa quide Yá Ndiõxí cuèndá sá vâ cundècu-gá cuéchi ñáyiú núú-gă. ¹⁰ Te vá càchí-ó sã cùtnàhá ní ngúndecu ndihi cue ñáyiú isràél tnúhu ndèé núú yũú-ãⁿ ño-gá váha ní quide-xi, te ñáhá chi uuⁿ-gá váha quide-xi vitna cuendá tnúhu sá càháⁿ nâcuáa quide Yá Ndiõxí. ¹¹ Te núu ducaⁿ ño váha ní quide-xi cútnàhá ní ngúndecu ndihi ñáyiú isràél tnúhu sá ñã túú ní cùdíi, te uuⁿ-gá ducaⁿ ño váha quide-xi vitna ní ngúndecu ndihi-o tnúhu sá vâ ndíhí ñihnu tnahí-gă.

¹² Te cùtnuní iní-ndí sá vâ ndíhí ñihnu sá dúcán ño váha quide-xi, núu xíãⁿ ío vii ío váha cùu iní-ndí càháⁿ-ndí tnúhu sá ñí ngúndecu ndihi-o. ¹³ Te ñã túú quide-ndí dàtná ní xóo cada ndíi Moisés, chi ndíi-án ñí xóo dàdâhu ndíi núú ndíi òré dátãsaⁿ-xi núú ndíi cuèndá sá vâ quini cue ñáyiú isràél òré ñã túú-gă dátãsaⁿ-xi núú ndíi. ¹⁴ Te cue ñáyiú isràél ñã túú ní tècú tnùní váha-yu nâcuáa ní xóo danèhé ñáhá ndíi Moisés xií-yu, te cuèi ndéé vitna ñã túú tècú tnùní-yu òré dácuàhá-yu tnúhu sá ñí càháⁿ Yá Ndiõxí ndéé díhna nâcuáa cada-gá, te cada iní-ó sã dàtná sá ñí xídâhu núú ndíi Moisés yídâhu núú-yu cuèndá sá vâ cútnùní núú-yu cundèhé-yu te tecú

tnùnì-yu, dico núu tnahá tnúhu-yu ndihì Xítohó Jesucristú te tecú tnùnì-yu. ¹⁵ Te cuèi ndéé vitna òré dácuàhá-yu nchaa tnúhu sá ñí chídó tnùnì ndíi Moisés nchaa núu tútú ndíi, te cada iní-ó sá dàtná sá ñí xídáhu núu ndíi yídáhu núu-yu chi ñá túú tècú tnùnì-yu. ¹⁶ Dico cue ñáyiu na tùha ñaha xii Xítohó Jesucristú te tècú tnùnì-yu tnúhu-gá. ¹⁷ Te Xítohó Jesucristú ìⁿ-ni cùu-gá ndihì Espíritú Yă Ndiöxí, te nchaa ñáyiu ndècu ndihì Espíritú-gá ñá túú-gă táxí tnùnì ñáhá ñí ìⁿ sá ñá túú vâha xii-yu. ¹⁸ Te dàtná cúú ìⁿ yutátá sá dánèhé núu ñáhá-xí xì ñáyiu ìⁿ sá vâha, ducaⁿ sãtnahá-xi cùu-o chi quide-o nacúaa cáháⁿ ñáyiu sá ïo càhnu cuu Xítohó Jesucristú, te ducaⁿ ùuⁿ-gá uuⁿ-gá tá cùndáá-ó ndècu-o ichi-gá dàtná quidé mèe-gá quidé ndăá-gá. Te Espíritú-gá quidé-xí dùcaⁿ ta cundáá-ó nũú-gă cuáháⁿ.

4

¹ Te mee Yă Ndiöxí ní cundàhú iní ñáhá-gă xii-ndí ní taxi-gá chiuⁿ quide-ndí càháⁿ-ndí tnúhu-gá, núu xíãⁿ ñá túú tnàhí nàtúhú iní-ndí càháⁿ-ndí tnúhu-gá. ² Te nchúhú dàquee tíhú-ndí nchaandi túhú sá ñá túú vâha quide dayuhu ñáyiu, chi nchaa xíãⁿ cúú-xí ìⁿ sácáⁿnũú sã cúú-xí-yu, te nchúhú ñá túú sàni iní-ndí dandàhú-ndí ñáyiu te ni ñá túú sàni iní-ndí dama-ndí nàcuáa càháⁿ tnúhu Yă Ndiöxí, chi càháⁿ ndáá-ndí nàcuáa tàú-xí cáháⁿ-ndí, te mee Yă Ndiöxí náhá-gă nàcuáa ndùu tnúhu càháⁿ-ndí núu ñáyiu, te ñáyiu-áⁿ cùtnùnì iní-yu sá nchũhú càháⁿ váha-ndí. ³ Te cue ñáyiu ñá túú tècú tnùnì nàcuáa ndùu tnúhu sá càháⁿ

nàcuáa naníhí tàhú-ó càháⁿ-ndí núŭ-yu, ñáyi-u-án cúŭ-yu ñáyi-u ta xíta nihnu cuáháⁿ. ⁴ Te cue ñáyi-u-án cúŭ-yu ñáyi-u ío sàá iní-xi chi ñá túú cuíní-yu quíndáá iní-yu tnúhu Xítohó Jesucristú, te xíáⁿ núŭ sácúíhná cúnù-xi núŭ-yu te ñíhí-xi nàcuáa quíde-xi dadáhu ndodo iní ñáhá-xí xii-yu cuendá sá vǎ tècú tnùní-yu tnúhu sá càháⁿ nàcuáa naníhí tàhú-yu, te tnúhu-án cúú-xí tnúhu sá ïo váha chi càháⁿ-xí sá ïo càhnu cuu Xítohó Jesucristú, te cùu-gá dàtná mée Tátá-gǎ Dútú Ndiǒxí. ⁵ Te nchúhú ñá túú càháⁿ-ndí cuendá sá cúú-xí mée-ndí núú-ndó chi càháⁿ-ndí cuendá Xítohó Jesucristú, te cǎchí-ndí xii-ndo sǎ díú-gǎ cúú-gǎ Yaá ío cùnuu, te cǎchí-ndí xii-ndo sǎ mée-ndí cúú-ndí dìcó-ni cue tée xínu cuechi sá cúú-xí-ndó, te ducaⁿ quíde-ndí nàcuáa cuu vii cuu váha iní Xítohó Jesucristú. ⁶ Te Yá Ndiǒxí Yaá ní dáyèhé ndée cútnàhá nee ñuyíú ní cùu, Yaá-án ñí cachí-gá sá Xítohó Jesucristú cada-gá nàcuáa tecú tnùní-ó sǎ ïo càhnu cuu mee Yá Ndiǒxí. Te sá dúcáⁿ ñí quíde-gá te cada iní-ó sǎ dàtná tnúhu sá ñí dáyèhé-gá iní-ó.

Ío quíndáá iní-ó Yǎ Ndiǒxí

⁷ Te nchúhú ndécú ndíhí-ndí tnúhu Xítohó Jesucristú, te tnúhu-gá cúú-xí dàtná ìⁿ sá ïo váha ñùhu ìⁿ xítí quídi ñuhu, te nchúhú cúú-ndí dàtná quídi-án. Te ducaⁿ sǎtnahá-xi cùu-ndí chi tnúhu-gá ío càhnu cuu-xi te mee-ndí ñáhá, te ducaⁿ cùu nàcuáa cutnùní sá mée Yǎ Ndiǒxí quíde-gǎ nchaa sá váha te ñá díú mée-ndí. ⁸ Te cuèi ío ndòho-ndí ndécú-ndí dico ñíhí-ndí nàcuáa quíde-ndí tá yǎha-ndí nchaa tnúndòho-án cuáháⁿ, cuèi áma sa ndètu vií-nǎ

quehndé iní-ndí sá vǎ ndácú-ndí yáha-ndí nchaa tnúndòho-áⁿ, dico ndàcu-ndí yáha-ndí. ⁹ Te cuèi nànducu ñaha ñáyiu cuìní-yu ná cada ñàhá-yu xii-ndí dico ñá túú dàña ñaha Yá Ndiöxí xii-ndí, te cuèi cànihá-yu xii-ndí dico cǎcu-ndí ñá túú sàhni ñàhá-yu. ¹⁰ Te nděni ní cuu cuáháⁿ-ndí xíca cùu-ndí, te cǎcu cǎcu cahni ñàhá-yu xii-ndí dàtná ní quidé-yu Xítóhó Jesucristú, te ducaⁿ yáha-ndí cuèndá cutnùní sá ndécú tǔu Xítóhó Jesucristú andíu te chìndee ñaha-gá xii-ndí. ¹¹ Te nchúhú ñini ndècu-ndí ñuyíú-a te nchaa-ni nduu cǎcu cǎcu cahni ñaha ñáyiu xii-ndí sá cuèndá Xítóhó Jesucristú, te ducaⁿ yáha-ndí ndécú-ndí cuèndá cutnùní sá Xítóhó Jesucristú ndécú ndíhi ñaha-gá xii-ndí cuèi vá cúdǐi yiqui cùñú-ndí cundecu-xi. ¹² Te sá dúcáⁿ cǎcu cǎcu cahni ñaha ñáyiu xii-ndí xǎⁿ nchòhó uuⁿ-gá tá ñihí ndéé-ndó cuáháⁿ ndécú-ndó ìchi Xítóhó Jesucristú.

¹³ Te ñⁿ téé ní xíndecu ndéé sanaha ñí chídó tnùní-dé núú tütú Yá Ndiöxí núú cǎchí-xi: “Yúhú ní sàndáá iní-í Yá Ndiöxí núu xǎⁿ ní cǎháⁿ-í”, duha ní cǎchí téé-áⁿ. Te dàtná-ni ní sani iní téé-áⁿ ñí cǎháⁿ-dé te ñíu-ni ducaⁿ sàni iní nchúhú tucu núu xǎⁿ cǎchí-ndí: “Sàndáá iní-ndí Yá Ndiöxí núu xǎⁿ cǎháⁿ-ndí”, duha cǎchí-ndí. ¹⁴ Te cùtnùní iní-ndí sá núu na cùú-ndí te Yá Ndiöxí dandòto ñaha-gá xii-ndí dàtná ní dándótó-gǎ Xítóhó Jesucristú, te tñàhá nchòhó ducaⁿ càda ñaha-gá xii-ndo, te dàvá-áⁿ candeca ñaha-gǎ xii-o quíhíⁿ nucúndecu-o núú-gǎ. ¹⁵ Te nchúhú náñdi cùu sá tá yáha-ndí véxi cuèndá nchòhó ngúndecu váha-ndo,

te ducaⁿ cuíta cáyá-gá ñáyiu ngúndecu váha sá xíí Yă Ndiöxí, te diu-ni ducaⁿ cuíta cuu vai-gá ñáyiu ndacáⁿ táhũ-yu núú-gă te cachí-yu sá ío cãhnu cuu-gá.

16 Te xíăⁿ nõu nchúhú ñá túú tnàhí nàtúhú iní-ndí ndécú-ndí ichi Xítóhó Jesucristú, te cuěi yiqui cùñú-ndí tá xàú-xi cuáháⁿ dico iní-ndí chi uuⁿ-gá uuⁿ-gá tá nihí ndée-xí cuáháⁿ. 17 Te nchaa sá ndóhó-ndí ñuyíú-a ñá túú cãchí-ndí sá cúú-xí ñⁿ tnúndòho cahnu vihi, chi tnaa-ni duha ndòho-ndí, te sá dúhá ndòho-ndí nándi ndòho-ndí ndécú-ndí ñuyíú-a te Yá Ndiöxí ío váha cada ñaha-gă xii-ndí nduu na sàá-ndí núú ndécú-gă, te diu-ni ducaⁿ càda ñaha-gá xii-ndí ni caa ni quíhíⁿ. 18 Te nchúhú ñá túú nchìcúⁿ nihnu-ndí sá tũu ndèhe-ndí ío ñuyíú-a, chi nchìcúⁿ nihnu-ndí sá vătă quíní-gá-ndí ndécú àndiú, te ducaⁿ quìde-ndí chi nchaa sá tũu ndèhe-ndí ío ñuyíú-a vá cúdíi-xi cundecu-xi, te nchaa sá ñà túú tũu ndècu andiú xíăⁿ cudíi-xi cundecu-xi ni caa ni quíhíⁿ.

5

1 Te yiqui cùñú-ó cùu-xi datná ñⁿ vehe, te vehe-áⁿ ñà túú cudíi-xi, te ducaⁿ sãtnahá-xi cùu yiqui cuñú-ó chi vá cudíi-xi, te na sàá nduu vă cùndècu-gá-ó ndíhi yiqui cuñú-ó, te Yá Ndiöxí taxi-gá ñⁿ yiqui cùñú sáá sã cúú-xí-ó, te xíăⁿ cúú-xí dàtná ñⁿ vehe sá ñà túú ní càdúha cue ñáyiu ñuyíú-a, chi mee Yă Ndiöxí ní cadúha-gá vehe-áⁿ te vehe-áⁿ cudíi-xi cundecu-xi ni caa ni quíhíⁿ andiú. Te ducaⁿ sãtnahá-xi cùu yiqui cuñú sá táxí Yă

Ndiöxí xii-o chi cudíi-xi cundecu-xi ni caa ni quíhíⁿ.
 2 Te nchúhú ndècu ndihí-gá-ndí yiqui cùñú-ndí sá ndécú ndihí-ndí vitna te sama cuíní-ndí sá ío ndíhí taxi Yá Ndiöxí yiqui cùñú sáá cùndecu ndihí-ndí.
 3 Chi mee-gă vâ dáñá-gă sá dúcáⁿ-ní cùnduu-ndí cundecu-ndí, chi dai taxi-gá yiqui cùñú sáá-ăⁿ xii-ndí. 4 Te nini ndècu-ndí ndihí yiqui cùñú-ndí vitna ío sàni iní-ndí te ndíhú iní-ndí, dico ñá díú sã dúhá quíde-ndí te ñá túú-gă tnàhá iní-ndí cundecu-ndí ndihí yiqui cùñú-ndí, chi cuíní-ndí sá Yă Ndiöxí ío ndíhí taxi-gá yiqui cùñú sáá ndùu táhú-ndí, chi xíăⁿ cudíi-xi ni caa ni quíhíⁿ te yiqui cùñú-ndí sá tá ndíhí nihnu cuáháⁿ-a vâ cudíi-xi cundecu-xi. 5 Te ducaⁿ tnàhí ní cachí Yă Ndiöxí cunduu sá dúcáⁿ ndùu táhú-ó yiqui cuñú sáá-ăⁿ, te ní taxi-gá Espíritú-gá ní ngúndecu ndihí-o cuendá cutnùní iní-ó sã ndàá taxi-gá yiqui cùñú sáá-ăⁿ nduu táhú-ó.

6 Te xíăⁿ nũu nchúhú nihí ndéé-ndí ndécú-ndí, te cùtnuní iní-ndí sá nini ndecu-ndí ndihí yiqui cùñú-ndí sá ndécú ndihí-ndí vitna te vátá sáá-gá-ndí cundecu-ndí mei nũú ndécú Xítohó Jesucristú. 7 Te ducaⁿ cùtnuní iní-ndí chi sàndáá iní-ndí Yă Ndiöxí ndécú-ndí ñuyúú-a cuéi ñá túú xíní-ndí-gá. 8 Te ío váha cùu iní-ndí ndécú-ndí, te sàni iní-ndí sá vâha-gá sá nũu vâ cùndècu-gá-ndí ndihí yiqui cùñú-ndí sá ndécú ndihí-ndí vitna. Te ducaⁿ sàni iní-ndí chi váha-gá cundecu-ndí mei nũú ndécú Xítohó Jesucristú. 9 Te ío ndùcu ndee-ndí quídé-ndí nàcuáa cuu vii cuu váha iní

Xítohó Jesucrístú vitna ndècu-ndí ñuyíú-a, te diu-ni ducaⁿ càda-ndí cuèi òré vá cùndècu-gá-ndí. ¹⁰ Te dacuítí sǎ ncháá-ó cùndècu-o núú Xítohó Jesucrístú ìⁿ nduu, te dàvá-áⁿ mee-gǎ cáháⁿ-gǎ te núu nása ndùu chiuⁿ ní quide-o ìⁿ ìⁿ-o, núu ní quide váha-o àdi ñá túú ní quide váha-o, te nàcuáa ndùu chiuⁿ ní quide-o ìⁿ ìⁿ-o te ducaⁿ ndùu sá táxí-gǎ nduu táhú-ó.

Nàcuáa ní cuu ní ngúndecu váha-o ndíhi Yá Ndiöxí

¹¹ Te nchúhú quíyùhú iní-ndí nàcuáa cada Xítohó Jesucrístú, núu xǎⁿ càháⁿ-ndí tnúhu-gǎ núú ñǎyiu cuendá xínu iní-yu tuha ñàhá-yu xii-gǎ. Te mee Yá Ndiöxí sa nàha-gǎ nàcuáa quide-ndí ndécú-ndí, te sàni iní-ndí sá nchòhó cutnùní iní-ndó nàcuáa quide-ndí ndécú-ndí. ¹² Te sá dúhá càháⁿ-ndí te vá cání iní-ndó sǎ nchùhú càháⁿ váha-ndí cuendá-ndí nàcuáa nchòhó cuu váha iní ñàhá-gǎ-ndó xì-ndí te ñàhá, chi duha càháⁿ-ndí cuendá sá nchòhó níhí-ndó tnùhu cáháⁿ váha-gǎ-ndó cuendá-ndí núú ñǎyiu. Te ducaⁿ ñíhí-ndó tnùhu cúñaha-ndo xì cue ñǎyiu quide nínu mee-xi, chi cue ñáyiu-áⁿ ñà túú quide cuendá-yu nása ndècu iní-yu. ¹³ Te núu nchòhó sání iní-ndó sǎ lúcú-ndí cuendá nàcuáa quide-ndí ndécú-ndí te cùu-xi cuendá Yá Ndiöxí, àdi núu sàni iní-ndó sǎ ñà túú lúcú-ndí cuendá nàcuáa quide-ndí ndécú-ndí te cùu-xi sá vǎha sá cúú-xí-ndó. ¹⁴ Te quide-ndí nàcuáa cuení Xítohó Jesucrístú chi cùtnuní iní-ndí sá ïo cùu iní-gǎ nchaa ñáyiu, te ducaⁿ xìní ndáá-ndí sá ñí xíhí-gǎ cuendá ncháá-yu, te xǎⁿ nùu cada iní-ó sǎ dàtná tnúhu

sá ncháá ñǎyiu ní xíhí-yu ndihí-gá. ¹⁵ Te ducaⁿ ñí xíhí Xítóhó Jesucristú cuendá nchaa ñǎyiu chi cuení-gá sá ncháá-yu cundecú-yu cadá-yu nàcuáa cuíni méé-gǎ te vá cadá-yu nàcuáa cuíni méé-yu, chi mee-gǎ ní xíhí-gá te ní ndoto-gá cuendá cuu-xí sá vǎha sá cúu-xí-yu. ¹⁶ Te xiǎⁿ núu nchúhú ñá túú-gǎ ná sání iní-ndí cuendá tnàha ñǎyiu-ndí núu nàndíhi-yu àdi ñá túú nàndíhi-yu dàtná ní xóo cani iní-ndí cútnàhá ní xíndecu-ndí ichi cuèhé ichi duha, te dàvá-áⁿ ñí xóo cani iní-ndí cuendá Xítóhó Jesucristú dàtná sání iní cue ñǎyiu ndècu ichi cuehé ichi duha vitna. ¹⁷ Te nchaa nchoo ñǎyiu ní tnahá tnúhu ndihí Xítóhó Jesucristú ní nduu-o dàtná ìⁿ ñǎyiu saa, te ducaⁿ chi ñá túú-gǎ quidé-ó dàtná ní xóo cada-o cùtnàhá ní xíndecu-o ìchi cuehé ichi duha, chi ní ngúíta-o quide-o mee-ná sá vǎha te nchaa xiǎⁿ cúu-xí sǎ sá sá cúu-xí-ó chi vátá quíni-gá-ó càda-o.

¹⁸ Te ducaⁿ quide-o ndecu-o chi mee Yǎ Ndiǒxí quidé-gǎ sá dúcáⁿ càda-o cundecu-o. Te Xítóhó Jesucristú ní quide-gá ní ngúndecu váha-o ndihí Yǎ Ndiǒxí vitna, te ducaⁿ chi mee Yǎ Ndiǒxí ducaⁿ tnàhí ní cachí-gá cunduu, te ñiu-ni mee Yǎ Ndiǒxí ní taxi-gá chiuⁿ quide-ndí càháⁿ-ndí tnúhu-gá nàcuáa ngúndecu váha cue ñǎyiu ndihí-gá. ¹⁹ Te ducaⁿ chi mee-gǎ ní cachí-gá sá Xítóhó Jesucristú cada-gá nàcuáa nucúndecu váha nchaa nchoo cuè ñǎyiu ndècu ñuyíú-a ndihí Yǎ Ndiǒxí. Te nchaa ñǎyiu ní tuha ñaha xii-gá ñá túú-gǎ sání iní-gá sá ñǎyiu-áⁿ nacháhu-yu cuéchi-yu núú-gǎ. Te mee Yǎ Ndiǒxí ní taxi-gá chiuⁿ quide-ndí càháⁿ-ndí tnúhu-gá núú ñǎyiu nàcuáa ngúndecu ndihí ñaha vǎha-yu xii-gá. ²⁰ Te Xítóhó Jesucristú ní cachí-gá

sá nchũhú cáháⁿ-ndí tnúhu-gá núú nchàa ñáyiú, te sá dúhá quide-ndí cáháⁿ-ndí tnúhu-gá te quide-ndí núú Yă Ndiõxí cáháⁿ-ndí yuhu-gá, te xĩăⁿ nõu cáháⁿ ndàhú-ndí núú-ndó sã tnàhá tnúhu-ndo ndĩhi Yă Ndiõxí cuendá cundecu váha-ndo ndĩhi-gá, te duha cáháⁿ-ndí chi ducaⁿ cãchí Xítóhó Jesucristú cada-ndí. ²¹ Te Xítóhó Jesucristú cúú-gã Yaá ñá túú tnàhí cuéchi-xi, dico Yă Ndiõxí ní quide ñaha-gã xii-gá dàtná ìⁿ ñáyiú ndècu cuéchi-xi, te ducaⁿ chi Xítóhó Jesucristú ní xido-gá cuéchi nchaa nchoo ñáyiú ñuyúú-a, te ducaⁿ ñi xido Xítóhó Jesucristú nchaa cuéchi-o cuendá sá nõu na tnàhá tnúhu-o ndĩhi-gá te cudũu-o núú Yă Ndiõxí, te ducaⁿ ñi cuu chi mee Yă Ndiõxí ducaⁿ ñi cachí-gá cunduu.

6

¹ Te nchoo ìⁿ-ni cùu-o quide chiuⁿ-o cuendá Yă Ndiõxí nõu xĩăⁿ cáháⁿ ndàhú-ndí núú-ndó sã vã dicó-ni ducaⁿ cùndedóho-ndo tnũhu Yă Ndiõxí, chi cada-ndo nãcuáa na chĩndee ñaha-ni-gá. ² Chi mee-gã cãchí-gá ìⁿ xichi núú tütú-gá núú cãchí-xi: Sáá nduu te cundàhú iní ñáhà-í xii-ndo chĩndee ñaha-í cuendá naníhí tãhú-ndó, te ní sáá nduu tàú-xi sá cùndàhú iní ñáhà-í xii-ndo chĩndee ñaha-í cuendá naníhí tãhú-ndó, núú xĩăⁿ ní xĩndedóho-í tnúhu ní cáháⁿ-ndó te ní chĩndee ñaha-í xii-ndo nãcuáa naníhí tãhú-ndó.

Duha cãchí-gá núú tütú-gá. Te vitna cùu-xi nduu cundahú iní ñáhá Yă Ndiõxí chĩndèe ñaha-gá, te cùu-xi nduu naníhí tãhú-ó.

³ Te nchúhú ñá túú quide-ndí ìⁿ sá ñà túú tàú-ndí cada-ndí sá cúú-xi ñáyiú, chi cuìní-ndí sá vã cáháⁿ

cuèhé-yu cuèndá chùⁿ quide-ndí. ⁴ Te nchaa sá quidé-ndí cúú-xí nàcuáa cutnùnì iní cue ñáiyu sá nchühú xínú cuèchi-ndí núú Yă Ndiöxí, te ío quide cahnu iní-ndí cuèndá nchaa sá ndóhó-ndí, chi nándi quide ñaha ñáiyu xii-ndí, te ducaⁿ-ni ta quide cahnu iní-ndí cuèi nándi-gá nchaa sá tá yăha-ndí véxi. ⁵ Te duha ta yăha-ndí véxi, núú cánha ñáiyu xii-ndí, núú chíhí ñáhá-yu vecaá, núú cuáa ndeé ñáhá ñáiyu xii-ndí xícuèhé ñáhă-yu, te ío ndòho-ndí quidé-ndí chùⁿ Yă Ndiöxí, te áma xídí-ndí te áma ñá túú xídí-ndí, te áma ñihí-ndí sá xéxí-ndí te áma ñá túú ñihí-ndí. ⁶ Te quide ndáá-ndí ndécú-ndí, te cùtnuní váha iní-ndí nàcuáa càháⁿ tnúhu Yă Ndiöxí, te quide cahnu iní-ndí cuèi nándi quide ñaha ñáiyu xii-ndí, te cùndahú iní-ndí tnàha ñáiyu-ndí, te quide-ndí nchaa sá vâha nàcuáa chindee ñaha Espíritú Yă Ndiöxí xii-ndí, te ío ndisa iní-ndí cúú ñihí-ndí cue tnàha ñáiyu-ndí. ⁷ Te dânehé-ndí ñáiyu mee-ni tnúhu ndáá, te nchaa chùⁿ quide-ndí te quide-ndí nàcuáa chindee ñaha Yă Ndiöxí xii-ndí, te cuèndá sá quidé ndáá-ndí ndécú-ndí nûu xíăⁿ ñihí ndéé-ndí dáquèe tíhú-ndí nchaa sá cuèhé sá dúhá. ⁸ Te dava ñáiyu quide nínu ñáhá-yu xii-ndí, te davá-yu tnúhu cuèhé tnúhu duha càháⁿ-yu xăhăⁿ-yu xii-ndí, te davá-yu xícáháⁿ váha-yu cuèndá-ndí te davá-yu xícáháⁿ cuèhé-yu, te davá-yu càchí-yu sá dândàhú-ndí ñáiyu dico ñá ndáá chi càháⁿ ndáá-ndí. ⁹ Te davá-yu càchí-yu sá ñà túú xíní-yu ná ñáiyu cùu-ndí, te davá-yu

càchí-yu sá xìní-yu yoo cùu-ndí, te davá-yu cuení-yu cahni ñáhá-yu xii-ndí dico vátá cáhni ñáha-gá-yu chi ndècu-ni-ndí. Te ío ndòho-ndí ndécú-ndí ichi Yá Ndiõxí, te cuèi ndòho-ndí dico ñá túú cùu-xi sá cùú-ndí. ¹⁰ Te cuèi ndìhú iní-ndí dico ñá túú dàña ndeé-ndí sá cúdí ìní-ndí, te cùu-ndí cue téé ndàhú dico sànu ichi-ndí vài ñáyiú ichi Yá Ndiõxí cuendá ngúndecu váha-yu sá cuendá-gá, te cuèi ñá túú ñá ndécú ndìhi-ndí dico ñá túú ñá cúmání xii-ndí.

¹¹ Te nchòhó ñáyiú ndècu ndìhi-í ichi Xítohó Jesucristú ndécú ñúú Còrintú ío cùu iní ñáhá-ndí xii-ndo, te ñi yùhu ñi iní-ndí càháⁿ-ndí nchaa tnúhu càháⁿ-ndí sá cúú-xí-ndó. ¹² Te nchúhú chi ñi yùhu ñi iní-ndí cúú ìní ñáhá-ndí xii-ndo, dico nchòhó chi ñá túú dùcaⁿ quide-ndo sá cúú-xí-ndí. ¹³ Te yúhú càháⁿ ndàhú-í núú-ndó dàtná quidé ìⁿ téé cùu tátá òré càháⁿ ndìhi-dé cue déhe-dé sá ñi yuhu ñi iní-ndó cùu iní ñáhá-ndó xii-ndí dàtná quidé mèe-ndí cúú ìní ñáhá-ndí xii-ndo.

Nchoo cùu-o datná ìⁿ vehe Yá Ndiõxí

¹⁴ Te cue ñáyiú ñá túú sàndáá iní tnúhu Xítohó Jesucristú, te vá cúú ìⁿnuu-ndo ndìhí-yu cada-ndo dàtná xíquidé-yu, chi dèⁿ cuu nchaa sá vǎha te dèⁿ cuu nchaa sá cuèhé sá dúhá, te ñúmí nchícanchii ndìhi niú chi ñá túú ìⁿ-ni cuu-xi. Te ducaⁿ sǎtnhá-xi cùu nchaa sá vǎha ndìhi nchaa sá cuèhé sá dúhá chi ñá túú ìⁿ-ni cuu-xi. ¹⁵ Te dèu-ni ducaⁿ ñá túú ìⁿ-ni cuu Xítohó Jesucristú ndìhi sácúíhná, te dèu-ni ducaⁿ ñá túú ìⁿ-ni cuu ñáyiú sàndáá iní ñáhá xii Xítohó Jesucristú ndìhi ñáyiú ñá túú sàndáá iní ñáhá xii-gá. ¹⁶ Te dèu-ni ducaⁿ sǎtnhá tucu-xi

cùu vehe Yá Ndiöxí ndihí nchaa sá cächí ñáyiú cùu ndióxí ní cadúha cue téé ñuyíú-a, chi vá cúú quíhi ni ñⁿ xíáⁿ xití vehe-gá. Te nchoo cùu-o datná vehe Yá Ndiöxí Yaá ndécú túu andiu, chi mee-gã cächí-gá núú tütú-gá núú cächí-xi:

Yúhú vá cúmăní cundecu-í ndihí-yu ndëni ní cuu na cundecú-yu,

te ðiu-ni yúhú cuu-í Ndiöxí-yu,

te mée-yu cuú-yu ñáyiú cùu cuendá-í.

Duha cächí-gá núú tütú-gá. ¹⁷ Te xíáⁿ nõu cächí tucu-gá ingá xichi núú tütú-gá núú cächí-xi:

Chí tá quèe tnuú nchaa ñáyiú ñá túú sàndáá iní ñáhá xii-í,

te vá cání ìní-ndó càda-ndo ni ñⁿ sá cuèhé sá dúhá,

te ducaⁿ te queheⁿ cuèndá ñáhà-í xii-ndo,

¹⁸ te yúhú cuu-í Tătá-ndó,

te nchòhó cuu-ndo cuè déhe ducuⁿ-í, ndihí cue déhe yoco-í,

duha cáháⁿ yúhú Yaá ío cànnyu cuu.

Duha cächí-gá núú tütú-gá.

7

¹ Te sá dúcáⁿ ïo váha cáháⁿ Yá Ndiöxí sá cúú-xí-ó nõu xíáⁿ cáháⁿ-í dóho nchòhó ñáyiú ío cùu iní-í sá dùuⁿ duuⁿ dañ-a-o nchaa sá cuèhé sá dúhá, chi nchaa xíáⁿ ñá túú cùu-xi sá vãha sá cúú-xí ìní-ó ndihí yiqui cuñú-ó, te cada-o nàcuáa tàú-xi cunduú nàcuáa cundáá-ó nõú Yá Ndiöxí, te cada-o sã néhé-ó sã yíñùhu núú-gã.

Cue ñáyiú ñuú Còrintú quidé vãha-yu

² Te ni yùhu ni iní-ndó chì cúú ìní ñáhá xii-ndí, chi nchúhú vá yõo ñⁿ quide úhú iní-ndí, te ni vã yõo

ɨ̃ⁿ dàcuíta nihnu-ndí, te ni vă yõ ɨ̃ⁿ dândahú-ndí.
 3 Te sá dúhá càháⁿ-í te vá cání ìní-ndó sã ɨ̃ⁿ cuéchi
 dàcaa-í díquí-ndó, chi dàtná sa ní cachí-í xii-ndo
 sã yũhú ío cùu iní ñáhà-í xii-ndo, te cuèi vitna
 ndècu-gá-ó ñùyíú-a àdi cuèi na cùú-ó dico ðiu-ni
 ducaⁿ cùu iní ñáhà-í xii-ndo. 4 Te yúhú ío váha
 sàni iní-í cuendá-ndó, te ducaⁿ ïo váha càháⁿ-í
 cuendá-ndó, te ío ndècu ndihí-í tnúhu ndee ìní
 cuendá-ndó, te ío cùdí ìní-í sá cuendá-ndó cuèi
 nándi ndòho-í ndihí dava-gá-güedé ndécú-ndí.

5 Te nchúhú cútnàhá ní sáháⁿ-ndí distritú
 Macèdoniá, te ñá túú tnàhí ni ndètatú-ndí cuendá
 nchaa sá ñi yáhandi chi ío ní ndoho-ndí cuendá
 nchaa sá ñi quidé-yu, chi ío ní cuándeé ñáhã-yu
 xii-ndí, te ío ní sani iní-ndí nõu nása-gá yáha-ndí
 ní cùu. 6 Dico Yá Ndiõxí ní taxi-gá tnúhu ndee
 ìní xii-ndí òré ní quexìo té Títú núú ndécú-ndí, te
 ðiu-ni Yaa-áⁿ cùú-gã Yaa sãñaha-gã tnúhu ndee
 ìní xii cue ñáyiu ndihú iní-xi. 7 Te ducaⁿ ñi taxi
 Yá Ndiõxí tnúhu ndee ìní xii-ndí cuendá sá ñi
 quexìo té Títú núú ndécú-ndí, te ñá díú-ní sã
 cuendá ní quexìo-dé chi ní níhí tucu-ndí tnúhu
 ndee ìní cuendá ní cani-dé cuendú núú-ndí sá
 nchòhó ní sãñaha-ndo tnúhu ndee ìní xii-dé, te
 ní cachí tnúhu-dé xii-ndí sá nchòhó ío cùní-ndó
 càháⁿ ndihí ñaha-ndo xii-ndí, te ní cachí tnúhu
 tucu-dé xii-ndí sá nchòhó ío ndihú iní-ndó cuendá
 nàcuáa cùu ndecu-ndo ni cuu, ndihí cuendá sá ïo
 sàni iní-ndó cuendá-í, te sá dúcáⁿ ndùu cuendú ní
 cani-dé núú-ndí nõu xíãⁿ ío ní cudí ìní-í.

8 Te nchòhó ní ndihú iní-ndó cuendá tnúhu
 càháⁿ-í núú tütú sá ñi dáquíxì-í ndaha-ndo, te òré

ní níhì-í tnúhu sá ndìhú iní-ndó te tnaa-ni ní ndixi
 cuéchi iní-í sá dúcáⁿ nǐ quide-í te dātnùní ñá túú-gǎ
 ní ndixi cuéchi iní-í. ⁹ Te vitna ní ndìhú iní-ndó, te
 xǎⁿ ní quide-xi ní ndixi cuéchi iní-ndó sǎ ñà túú
 quide váha-ndo ndècu-ndo ni cuu, te ní cudíí iní-í
 dico ñá díú cuendá sá nǐ ndìhú iní-ndó nǐ cudíí
 iní-í chi cuendá sá nǐ ndixi cuéchi iní-ndó, te ní
 ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ní cuu-xi ìⁿ sá vǎha sá cúú-xí-ndó
 cuendá tnúhu ní cáháⁿ-í te ñá túú ní cùu-xi ìⁿ sá
 cuèhé sá cúú-xí-ndó. ¹⁰ Te nchoo nǔu na ndìhú
 iní-ó nàcuáa cuu váha iní Yǎ Ndiöxí, te ndixi cuéchi
 iní-ó te nǔu ñá túú quide váha-o ndècu-o, te sá
 dúcáⁿ quide-o te nàníhí tàhú-ó, te vá ndìhú iní-ó sǎ
 dúcáⁿ nǐ quide-o, te dava ñáyiu xǐndecu ichi cuèhé
 ichi duha ndìhú iní-yu dico ñá túú ndixi cuéchi
 iní-yu cuendá nchaa sá ñà túú vǎha quidé-yu, te sá
 dúcáⁿ quidé-yu te cuíta nihnú-yu. ¹¹ Te sá dúcáⁿ
 nǐ ndìhú iní-ndó nàcuáa ní cuu váha iní Yǎ Ndiöxí,
 te xǎⁿ nǔu ndùcu ndee-ndo quide-ndo nchaa
 nacuáa tàú-xi cunduu, te vitna nǐ yùhu nǐ iní-ndó
 càháⁿ-ndó sǎ quidé vǎha-ndo, te ío cùdééⁿ-ndó nǔú
 méé-ndó sǎ ñà túú quide váha-ndo ndècu-ndo ni
 cuu, te yùhú-ndó ndècu-ndo cuendá sá ñà túú
 quide váha-ndo ni cùu, te ío ní xúhuⁿ iní ñáhá-ndó
 xì-í, te ní ndúcú ndéé-ndó nǐ quide ndáá-ndó
 cuendá téé ndècuéchi ndècu ndìhi-ndo, te sá dúcáⁿ
 nǐ quide-ndo te xǎⁿ ní cutnùní sá méé-ndó ñà
 túú cuèchi-ndo. ¹² Te ní cadúha-í tutú ní dáquíxì-í
 ndaha-ndo, te ní quide-ndo nàcuáa ní cáháⁿ-í, te
 sá dúcáⁿ nǐ quide-ndo xǎⁿ ní cutnùní iní-ndó sǎ
 ïo cùu iní ñáhá-ndó xì-í. Te Yá Ndiöxí náhá-gǎ
 sá díú cuendá xǎⁿ ní dáquíxì-í tutú ndaha-ndo, te

ñá díú-ní cuendá sá sání ìní-í cuendá té ndècuéchi ndècu ndìhi-ndo, te ni ñà díú-ní cuendá ñáyiú ní dándìhú té ndècuéchi-áⁿ iní-xi ní càdúha-í tutú ní dáquíxi-í ndaha-ndo. ¹³ Te cuendá sá quidé vâha-ndo ndècu-ndo xǎⁿ cúú-xí tnùhu ndee ìní ndécú ndìhi-ndí.

Dico ñá díú-ní xǎⁿ chi tnàhá ío cùdíí ìní-ndí cuendá sá ío cùdíí ìní té Títú, te ducaⁿ cùdíí ìní-dé chi nchòhó ní sáñaha-ndo tnùhu ndee ìní xii-dé. ¹⁴ Te yúhú ñá túú cùcahaⁿ núú-í sá nì cáháⁿ váha-í cuendá-ndó núú tē Títú cútnàhá vátá quíxí-gǎ-dé núú ndécú-ndó, chi ní cutnùní ìní-dé sá ndàá càháⁿ váha-í nàcuáa quide-ndo datná cúú-xí sǎ ndàá nchaa tnúhu dàcuaha ñaha-í xii-ndo. ¹⁵ Te vitna ío-gǎ váha cùu ìní té Títú cuendá-ndó, chi ndàcu ìní-dé sá ncháá-ndó ío váha ní tnií-ndo nchaa tnúhu ní cáháⁿ-dé núú-ndó, te ndàcu tucu ìní-dé sá nǐ queheⁿ cuendá váha-ndo-dě, te ní dátúu-ndo núú-dě sá ío ní quiyùhú ìní-ndó sǎ vǎ ndácú-ndó càda-ndo nchaa nacuáa tàú-xi cunduu. ¹⁶ Te ío cùdíí ìní-í cuendá-ndó chi cùtnuní ndáá ìní-í sá ñà túú dàña ndeé-ndó quide-ndo nchaa nacuáa tàú-xi cunduu.

8

Ío váha cuu ìní-ó chìndee tnaha-o

¹ Te nchòhó ñáyiú ndècu ndìhi-ndí ichi Xítóhó Jesucristú càchí tnúhu-ndí xii-ndo nàcuáa quide ñaha Yá Ndiõxí xii cue ñáyiú xǎndecu ichi-gǎ ndécú dìstrítú Macèdoniá, chi ío chìndee ñaha-gǎ xií-yu cuendá sá quidé vâha-yu ndécú-yu. ² Te cuéi ndòho vihí-yu ndécú-yu dico ío-ni cùdíí ìní-yu, te cuendá xǎⁿ núu nǐ yùhu nǐ ìní-yu ní sacáⁿ tnáhǎ-yu díhúⁿ

să cúú-xí tnàha ñáyíú-yu, te ñá túú tnàhí ni xĩnduu díi-yu cuèi ío ndàhú-yu. ³ Te ñá díú-ní nàcuáa ní sani iní-yu ndacú-yu cacáⁿ tnáhă-yu, chi ní quide yica iní-yu ní sacáⁿ tnáhá-gă-yu, te yúhú càchí tnúhu ndáá-í xii-ndo să ñi yuhu ñi iní-yu ducaⁿ ñi quidé-yu. ⁴ Te ío ní cáháⁿ ndàhú-yu núú-ndĩ cuendá sá cuăha-ndĩ tnúhu sá tnáhá-yu chindèé-yu dava-gá cue ñáyíu cùu cuendá Yă Ndiöxí. ⁵ Te ñá díú-ní nàcuáa ní sani iní-ndĩ ní quidé-yu, chi ní xídó-gă-yu ní quide váha-yu, te ducaⁿ chi mèé-yu ní sani iní-yu sá cáďă-yu nchaa nàcuáa cuiní Yă Ndiöxí, te dătnùní ducaⁿ te ní cachí-yu sá cúú căďă-yu nchaa nàcuáa na cũñaha-ndĩ xií-yu. Te ducaⁿ ñi quidé-yu chi ducaⁿ ñi cuiní mée Yă Ndiöxí cunduu. ⁶ Te sá dúcáⁿ ñi quide ñáyíu-áⁿ nũu xiăⁿ căháⁿ ndàhú-ndĩ núú tẽ Títú sá quíxí tùcu-dé núú ndécú-ndó cuendá dăxínu cava-dé chiúⁿ sá sà ní ngũíta-dé quidé-dẽ dătăcă-dé díhúⁿ să sà ní ngũíta-ndo săcáⁿ tnáhá-ndó, te ducaⁿ quide-ndo chi cùndahú iní-ndó tnàha ñáyíu-ndo. ⁷ Te nchòhó cúú-ndó ñáyíu ío ngòdónúú quide nchaa sá văha, te ío váha sàndáá iní-ndó Xítóhó Jesucrístú, te ío váha cùtnuní iní-ndó nàcuáa căháⁿ tnúhu-gá, te ío váha dăcuaha-ndo ñáyíu tnúhu-gá, te ío ndùcu ndee-ndo quide-ndo mee-ñi sá văha, te ducaⁿ ño cùu iní ñáhá-ndó xì-ndĩ, te sá dúcáⁿ quide-ndo núu xiăⁿ căháⁿ ndàhú-í núú-ndó să ngòdó núú-gă-ndó căďă-ndo sá cúú-xí tnàha ñáyíu-ndo.

⁸ Dico yúhú ñá túú tàuchiuⁿ-í sá dúcáⁿ căďă-ndo, chi cuendá-ñi sá căchí tnúhu-í xii-ndo nàcuáa quide dava-gá cue ñáyíu ndècu ichi Xítóhó Jesucrístú,

chi cue ñáyiú-áⁿ ni yùhu ni iní-yu quidé-yu sá vâha sá cúú-xí tnâha ñáyiú-yu, te câchí tnúhu-í xii-ndo nâcuáa quidé-yu cuendá cutnùní nûu nása cada-ndo nûu ndisa sá cúú iní-ndó cuè tnaha ñáyiú-ndo. ⁹ Te nchòhó sa xini-ndó sã Xitohó Jesucristú ío cùndahú iní ñáhá-gã xii-o, te ío váha ndècu-gá ní cùu te ní quixi-gá ñuyíú-a ní guide váha ñaha-gã xii-o, te ñuyíú-a ñá túú ní xĩndecu váha-gá, te ducaⁿ ñi quixi-gá ñuyíú-a cuèi ñá túú ní xĩndecu váha-gá cuendá sá nchóó ngũndecu váha-o nûú ndécú-gã.

¹⁰ Te na câchí tnúhu-í xii-ndo nâcuáa sàni iní-í. Chìuⁿ sá ñi yuhu ni iní-ndó ñi ngũíta-ndo quide-ndo cuía ñi yáha chi cùu-xi sá vâha sá cúú-xí-ndó nûu na dàxínu cava-ndo. ¹¹ Te dàtná-ni ni yùhu ni iní-ndó ñi tausaha-ndo chìuⁿ-áⁿ te ducaⁿ-ni ñi yuhu ni iní-ndó dàxínu cava-ndo, te cacáⁿ tnáhá-ndó sã ndécú ndihí-ndo nacuáa xito mee-ndo ndacu-ndo. ¹² Te nûu nchòhó ni yùhu ni iní-ndó càcáⁿ tnáhá-ndó sã xító mèe-ndo ndacu-ndo ña, te cùu váha iní Yã Ndiõxí, chi mee-gã sa nâha-gá nása ndècu-o te ndùu vétú-ni iní-gá.

¹³ Te sá dúhá ndùu tnúhu càháⁿ-í te vá cání iní-ndó sã yùhú cuiní-í sá nchòhó ndoho-ndo cùndecu-ndo te dava-gá-yu ngũndecu váha-yu sá cuendá-ndó. ¹⁴ Te vitna ndècu ndee iní-ndó nâcuáa ndacu-ndo chĩndee-ndo cue ñáyiú xini ñuhu, te nduu ña túú ndècu ndee iní-ndó te cue ñáyiú-áⁿ chĩndee ñáhá-yu xii-ndo te nûu ndècu ndee iní-yu, te ducaⁿ te ñi nchòhó ñá túú ña cumání xii-ndo te ñi cuè ñáyiú-áⁿ ñá túú ña cumání xii-yu. ¹⁵ Te ducaⁿ te quee ndáá-xi nâcuáa càháⁿ-xi núú tûtú Yã Ndiõxí núú câchí-xi: “Cue ñáyiú ío vai sá ni ñihí ñá túú ní

cùu sobrá xií-yu, te cue ñáyiú sacú ní níhí ñá túú ní cùmání xií-yu”, duha càchí-xi núú tùtú-gá.

Té Títú ndihí cue té cùndihí-dé

¹⁶ Te ndàcáⁿ táhù-í núú Yă Ndiöxí chi mee-gă ní quide sá tē Títú ío ñùhu iní ñáhá-dě xii-ndo dàtná ñúhú ìní ñáhà-í xii-ndo. ¹⁷ Te yúhú ní xáhaⁿ-í xii-dé sá quíxí còto ñaha-dé xii-ndo te ní sáha-dé tnúhu, te ñá díú mèe-ni sá dúcáⁿ ñí xáhaⁿ-í xii-dé quixi coto ñaha-dě xii-ndo, chi mee-dě cúdǎ^í tnàhí iní-dé quixi coto ñaha-dě xii-ndo.

¹⁸ Te tendaha-ndǎ^í ñⁿ tée ndècu ndihí-o ichi Xítóhó Jesucrístú quixi-dé ndihí té Títú, te tée quixi ndihí té Títú-áⁿ cúú-dě ñⁿ tée ío váha càháⁿ cue ñáyiú xǐndecu ichi Xítóhó Jesucrístú cuendá-dé cuendá sá ïo váha quide-dé chùⁿ Xítóhó Jesucrístú càháⁿ-dé tnúhu-gá tnúhu sá càháⁿ nàcuáa naníhí tǎhú-ó. ¹⁹ Te cue ñáyiú xǐndecu ichi Xítóhó Jesucrístú ñá díú-ní sǎ càháⁿ váha-yu cuendá-dé, chí tnàhá ní cáxi ñàhá-yu xii-dé cuendá sá cáca cùu ndihí ñaha-dé xii-ndí chindee ñàhá-dé tacá sá cúú-xí ñáyiú ndàhú, te quide-ndí chùⁿ-a cuendá ío cuu càhnu Yă Ndiöxí, te cue ñáyiú cutnùní iní-yu sá nchòhó ni yùhu ni iní-ndó quide-ndo nchaa sá vǎha sá cúú-xí cuè tnaha ñáyiú-ndo. ²⁰ Te cuìní-ndí sá vǎ càháⁿ cuèhé ñáyiú cuendá nàcuáa quide-ndí ndihí sá ngǎutnàha sá cúú-xí cuè tnaha ñáyiú-o, te ío vǎi cuu-xi. ²¹ Chi ndùcu ndee-ndí quidé-ndǎ^í nàcuáa cáháⁿ váha Xítóhó Jesucrístú cuendá-ndí, te quide tucu-ndí nàcuáa cáháⁿ váha ñáyiú sá quidé vǎha-ndí.

²² Te tendaha tùcu-ndí ingá tucu tée ndècu ndihí-o ichi Xítóhó Jesucrístú quixi-dé ndihí

cue téé úú quixi coto ñaha xii-ndo, te téé quixi ndihí-güedé-áⁿ ñí cuu vai xito quide-dé nàcuáa cutnùní iní-ndí sá ïo ndùcu ndee-dé quidé-dě sá vǎha, te vitna ío-gá cuìní-dé cada-dé sá vǎha vitna quixi-dé núú ndécú-ndó, chí cùtnuní ndáá iní-dé sá cúú-ndó cuè ñáyiú quide váha. ²³ Te cǎchí tnúhu-í xii-ndo sǎ tǎ Títú cúú-dě ìⁿ téé cùndihí-í quidé-ndí chiuⁿ Xítóhó Jesucrístú, te tnáhá-dé cúú-dě ìⁿ téé xínu cuechi núú-ndó cǎháⁿ-dé tnúhu-gá. Te cǎchí tnúhu tucu-í xii-ndo cuèndá cue téé úú quixi ndihí-dé, chí cue téé-áⁿ cúú-güedě cue téé tendaha cuè ñáyiú xǐndecu ichi Xítóhó Jesucrístú quixi coto ñaha xii-ndo. Te cue téé-áⁿ quidé-güedě nàcuáa cachí ñáyiú sá ïo cǎhnu cuu Xítóhó Jesucrístú. ²⁴ Te chí cǎdá sǎ cúú iní ndisa-ndo-güedě cuèndá ducaⁿ na cùtnuní iní nchaa dava-gá ñáyiú xǐndecu ichi Xítóhó Jesucrístú sá ndáá ndisa ducaⁿ quide-ndo, te ducaⁿ cùtnuní iní-yu sá ndáá ndisa quide váha-ndo dàtná cǎháⁿ-ndí cuèndá-ndó sǎ quidé vǎha-ndo.

9

Cuèndá sá ngǎutnàha sá cúú-xí cuè ñáyiú xǐndecu ichi Xítóhó Jesucrístú

¹ Te cuèndá sá ngǎutnàha sá cúú-xí cuè ñáyiú ndècu ichi Xítóhó Jesucrístú ñá túú-gǎ xíní ñùhu-xi cachí tnúhu-í xii-ndo nǔú tütú-a nàcuáa cada-ndo, ² chí sa cùtnuní iní-í sá ïo cuìní-ndó chǐndee-ndó-yu. Te ducaⁿ-ni ïo váha cǎháⁿ-í cuèndá-ndó nǔú ñáyiú xǐndecu ichi Xítóhó Jesucrístú ndécú dìstrítú Macèdoniá, te xǎhaⁿ-í xii-yu sá nchòhó ñáyiú xǐndecu ichi Xítóhó Jesucrístú ndécú dìstrítú Acáyá sa ní cuu ìⁿ cuíá ducaⁿ cuìní-ndó cǎcáⁿ tnáhá-ndó

să cúú-xí cuè ñáyiú ndàhú ndécú ìchi-gá. Te vâi cue ñáyiú distritú Macèdoniá cuìní-yu cacáⁿ tnáhă-yu sá cúú-xí cuè ñáyiú ndàhú ndécú ìchi Xítóhó Jesucristú cuèndá sá ñí níhî-yu tnúhu sá nchòhó ío cuìní-ndó dùcaⁿ cada-ndo. ³ Te cuèndá sá sání iní-ndó càda-ndo xiăⁿ tendaha-î cue téé ndècu ndihî-o ichi Xítóhó Jesucristú quixi-güedé núú ndécú-ndó cuèndá dâtúha ñaha-güedê xii-ndo, cuèndá sá vâ quée ndèhnde-í núú ñáyiú sá ñí cáháⁿ váha-í cuèndá-ndó, te ducaⁿ cùndecu túha ndisa-ndo dâtná sa ní cáháⁿ-í núú-yu. ⁴ Chi na cuáháⁿ ndèé quixi-í ndihî ìⁿ ũú cue ñáyiú distritú Macèdoniá núú ndécú-ndó te quiní-yu sá ñà túú ndècu túha-ndo, te cucahaⁿ núú-í núú-yu sá ñí cáháⁿ váha-í cuèndá-ndó te núú ñà túú ndècu túha-ndo, te tnáhá-ndó cùcahaⁿ núú-ndó. ⁵ Te xiăⁿ núú ní sani iní-í sá vâha-gá codonùu cue téé ndècu ndihî-o ichi Xítóhó Jesucristú quixi coto ñaha-güedê xii-ndo cuèndá chindee ñaha-güedé tacá sá ñí sani iní-ndó càcáⁿ tnáhá-ndó cuèndá sá cùndècu túha-xi, te cuu-xi dâtná ìⁿ táhú sâ ñí quene cuu iní méé-ndó càcáⁿ tnáhá-ndó sâ cúú-xí cuè tnaha ñáyiú-ndo. Te ducaⁿ te vá yôo cani iní-xi quesâhá-yu sá nchũhú ní quide yica-ndî ducaⁿ ñí sacáⁿ tnáhá-ndó.

⁶ Te nchòhó sa xìní-ndó sâ ñáyiú na chîhi vai tatá te vâi ñíhî-yu cùu, te cue ñáyiú na chîhi sacú tatá te sacú ñíhî-yu cùu. Ducaⁿ sâtnahá-xi cùu ñáyiú sàcáⁿ tnáhá sâ cúú-xí tnàha ñáyiú-yu. ⁷ Te ìⁿ ìⁿ-ndo càcáⁿ tnáhá-ndó nâcuâa quène cuu iní méé-ndó, te ío váha cuu iní-ndó dùcaⁿ cada-ndo te vá cádá-ndó cuèndá-ñí sá quidé yica ñaha ñáyiú xii-ndo, chi Yá Ndiõxí cúú vâha iní-gá núú nchâa ñáyiú cùdîî iní sàcáⁿ tnáhá sâ cúú-xí cuè tnaha

ñáyi-xi. ⁸ Te Yá Ndiöxí ndacu-gá chindee ñàha-gá xii-ndo nàcuáa cundecu váha-ndo, chi diu-gá cada te ñíhí-ndó nchàa núú sã xíní ñùhu-ndo cundecu ndíhi-ndo, te ñá túú tnáhi-gá ná cumání xii-ndo, te mee-gã chindee ñàha-gá xii-ndo ñíhí-ndó ïo vãi cundecu ndíhi-ndo cuendá ducaⁿ chindee-ndo cue tnaha ñáyi-ndo. ⁹ Te núú tütú Yá Ndiöxí cächí-xi ïⁿ xichi:

Ïⁿ ñáyi ïo vãi sá ñí sãñàhá-yu xii ñáyi ndàhú,
te sá ñí quide ñáyi-áⁿ ñí cuu-xi sá vãha sá vã yõo
cùnaa.

Duha cächí-xi núú tütú-gá. ¹⁰ Te mee Yá Ndiöxí táxi-gã nchaa sá cúú tàtá nchaa nchòhó ñáyi xitu nándí sá xítú cuendá cuu sá cúú nchìto-ndo, te diu-gá cada te ïo vãi sá ñíhí-ndó cundecu ndíhi-ndo, te ducaⁿ ïo-gá vãi sá vãha cada-ndo sã cúú-xí cue tnaha ñáyi-ndo. ¹¹ Te Yá Ndiöxí taxi-gá vãi núú sã cùndècu ndíhi-ndo cuendá ducaⁿ ñí yuhu ñí iní-ndó vãi cuãñaha-ndo sã cúú-xí tnàha ñáyi-ndo. Te cuendá nchaa sá sàcáⁿ tnáhá-ndó quèheⁿ cuendá-ndí cuu xii tnàha ñáyi-ndo, te cue ñáyi-áⁿ ïo ndacáⁿ táhũ-yu núú Yá Ndiöxí cuendá sá dúcáⁿ sàcáⁿ tnáhá-ndó sã cúú-xí-yu. ¹² Te sá dúcáⁿ quide-ndo sacáⁿ tnáhá-ndó sã cúú-xí cue ñáyi cùu cuendá Yá Ndiöxí, te ñáyi-áⁿ ñà túú-gã ná cumání xii-yu, te ïo ndacáⁿ táhũ-yu núú Yá Ndiöxí sá dúcáⁿ quide-ndo. ¹³ Te ñáyi-áⁿ cutnùní iní-yu sá nchòhó quidé-ndó sã sàndáá ndisa iní-ndó tnũhu Xítóhó Jesucristú, te cuendá xíãⁿ te ñáyi-áⁿ chiñhú-yu Yá Ndiöxí, te cuendá sá dúcáⁿ ñí yuhu ñí iní-ndó sàcáⁿ tnáhá-ndó sã cúú-xí-yu ndíhi sá cúú-xí nchàa dava-gá ñáyi, te cachí-yu sá ïo càhnu cuu Yá Ndiöxí. ¹⁴ Te ñáyi-áⁿ

cáháⁿ ndihí-yu Yá Ndiöxí cuendá-ndó, te ío cuu váha iní ñáhã-yu xii-ndo cuendá sá Yã Ndiöxí chindèe ñaha-gá xii-ndo quide-ndo sá vãha sá cúu-xí-yu ndihí dava-gá ñáyiu. ¹⁵ Te ío ndàcáⁿ táhú-ó nũú Yã Ndiöxí cuendá sá ñĩ taxi-gá sá ïo váha ndècu ndihí-o, te ni ñã cútnùní iní-ó ñãsa cunduu tnúhu cáháⁿ-ó cuendá sá vãha ní taxi-gá.

10

Té Pãblú ndécú ndihí-dé tnúhu ndee iní sá cãháⁿ-dé tnúhu Xítohó Jesucrístú

¹ Te Xítohó Jesucrístú ío cãhnu iní-gá, te cùndahú iní ñáhã-gã xii-o chindèe ñaha-gá, núu xíãⁿ yúhú té Pãblú ducaⁿ quide-í cãháⁿ ndàhú-í núú-ndó nàcuáa cada-ndo. Te dava-ndo cãchí-ndó sã yũhú ío ndàhú iní-í òré ndécú ndihí ñaha-í xii-ndo, te òré ñã túú ndècu ndihí ñaha-í xii-ndo te ío ñĩ cáã-í. ² Te cãháⁿ ndàhú-í núú-ndó sã cádá-ndó nàcuáa vá cãháⁿ ñĩ-í núú-ndó òré quixi-í quixi coto ñaha-í xii-ndo. Te cuení-í sá ndihí tnúhu ñĩ iní-xi cáhãⁿ ndihí-í cue ñáyiu cãchí sá ñĩⁿ-ni cuu-í ndihí cue ñáyiu ñã túú sãndáá iní tnúhu Xítohó Jesucrístú. ³ Te nchúhú cùu-ndí cue téé ñuyúú-a, dico ndùcu ndee-ndí quidé-ndĩ nàcuáa ndàcu-ndí dáquèe tíhú-ndĩ nchaa sá cuèhé sá dúhá, dico ñã díú mèe-ndí ducaⁿ ndàcu-ndí quidé-ndĩ, ⁴ te ni ñĩⁿ sá ío ñuyúú-a ñã túú chindèe ñaha-xi, chi mee Yã Ndiöxí chindèe ñaha-gá xii-ndí dáquèe tíhú duuⁿ-ndí nchaa núú sã cuèhé sá dúhá. ⁵ Te xíãⁿ nũu ñihí-ndí tnúhu cãháⁿ-ndí sàdí-ndí yuhu cue ñáyiu cãháⁿ tnúhu sá ñã túú cùu váha iní Yã Ndiöxí,

ñáyiú xǐquide nínu mee-xi càchí sá ñà túú nàndíhi tnúhu-gá. Te quíde-ndí sá ñáyiú-án quíndáá iní-yu tnúhu Xítóhó Jesucristú. ⁶ Te nchúhú sa ndècu túha-ndí sá dáquètíhú-ndǐ cue ñáyiú ñá túú cuíní cada nàcuáa cuíní Xítóhó Jesucristú, dico díhna-gá xíní ñùhu-xi sá ncháá nchòhó ñáyiú cuíní cada nàcuáa cuíní-gá cundáá-ndó.

⁷ Te nchòhó nàcuáa ndùu sá ndéhé-ndó te ducaⁿ sàni iní-ndó, dico vá dúcáⁿ càni iní-ndó cuèndá-ndí. Chi núu cùtnuní ndáá iní-ndó sǎ cúú-ndó cuèndá Xítóhó Jesucristú, te diu-ni ducaⁿ tàú-ndó càni iní-ndó cuèndá-ndí tucu. ⁸ Te Xítóhó Jesucristú ní taxi-gá tnúhu ndee iní ndécú ndíhi-ndí sá dánèhé ñáhá-ndǐ xii-ndo nàcuáa cuita cuehnu nihnu-ndo ìchi-gá quíhíⁿ, te ñá díú sǎ dánèhé ñáhá-ndǐ xii-ndo nàcuáa cuíta nihnu-ndo, te cuèi na chido-gá-í cáháⁿ-í cada nínu-í mée-í cuèndá tnúhu ndee iní ní taxi Xítóhó Jesucristú ndécú ndíhi-ndí, dico vá cúcàhaⁿ núu-í chi càháⁿ ndáá-í. ⁹ Te ñá túú cuíní-í sá nchòhó caní iní-ndó sǎ yùhú dáyùhú ñàhá-í xii-ndo nàcuáa ndùu tnúhu càháⁿ-í núú tütú-í. ¹⁰ Te ðava-ndo càchí-ndó sǎ tènáá ñàhá-í xii-ndo núú tütú-í, te mee-ni tñùhu càhnu sá ïo cùnùu cuu-xi, te càchí tucu-ndo sǎ òré ndécú ndíhi ñàhá-í xii-ndo te ñá túú càa-í sá cúú-í ìⁿ tée cùu váha cùu dico iní-ndó, te càchí tucu-ndo sǎ ñà túú tñàhá iní-ndó nàcuáa quíde-í òré dácuàha ñàhá-í xii-ndo. ¹¹ Te nchòhó ñáyiú ducaⁿ càháⁿ cada cuèndá váha-ndo sǎ dàtná-ni càháⁿ-ndí núú tütú-ndí diu-ni ducaⁿ quíde-ndí òré ndécú ndíhi ñàhá-ndí xii-ndo.

¹² Te nchúhú, vá cúú tñàhí cáháⁿ-ndí sá ìⁿ-ni cuu-ndí ndíhi cue ñáyiú càháⁿ váha cuèndá méé-xí, chi ñáyiú-án sání iní-yu ná cúú sǎ váha te quíde-yu

te xǎⁿ càchí-yu sá ïo váha quidé-yu, te càchí-yu sá quidé vǎha-gá-yu dàcúúxí tnàha ñáyíu-yu, te sá dúcáⁿ càháⁿ-yu te quidé-yu dàtná quidé cuè ñáyíu ñá túú tnàhí cùtnuní iní-xi. ¹³ Te dico nchúhú ñá túú xidó-ndí cáháⁿ váha-ndí cuèndá-ndí, chi càháⁿ váha-ndí cuèndá-ndí dico nàcuáa ndùu chiuⁿ ní taxi Yá Ndiöxí càháⁿ-ndí, chi mee-gǎ ní cachí-gá ndèé není sáa-ndí cáháⁿ-ndí tnúhu-gá, te ní sáa-ndí ndéé ñuú-ndó càháⁿ-ndí tnúhu-gá. ¹⁴ Te vitna ndècu ndihí-ndí tnúhu ndee ìní sá tnàhá nchòhó cuu cáháⁿ ndihí ñaha-ndí xii-ndo, chi díhna-gá nchúhú ní quixi-ndí ní cáháⁿ-ndí tnúhu Xítóhó Jesucristú ñuú-ndó, tnúhu sá càháⁿ nàcuáa naníhí tàhú-ó. ¹⁵ Te nchúhú ñá túú quide cahnu-ndí méé-ndí cuèndá chiuⁿ quide dava-gá-güedé que-saha-ndí sá chíuⁿ mèe-ndí cúú-xí. Te cuèní-ndí sá nchòhó cuita quindáa-gá iní-ndó Xítóhó Jesucristú, te ducaⁿ te níhí-gǎ-ndí nàcuáa cada-ndí chiuⁿ-gá nchaa dava-gá xichi núú nǐ cachí-gá cada-ndí chiuⁿ-gá. ¹⁶ Chi cáháⁿ-ndí tnúhu-gá tnúhu sá càháⁿ nàcuáa naníhí tàhú-ó, te yáha-gá-ndí ñuú-ndó quǐhíⁿ-ndí nchaa dava-gá xichi cáháⁿ-ndí, te vá cáda càhnu-ndí méé-ndí cuèndá chiuⁿ sá sà ní quide dava-gá-güedé.

¹⁷ Te cue ñáyíu cuèní cada càhnu mee-xi te vá dúcáⁿ càdá-yu, chi mee Xítóhó Jesucristú ná càda cahnú-yu-gá. ¹⁸ Te nchaa ñáyíu na càháⁿ váha Xítóhó Jesucristú cuèndá-yu, ñáyíu-áⁿ cúdiú-yu núú-gǎ, te ñá túú cùdiú-yu núú-gǎ cuèndá sá càháⁿ váha-yu cuèndá méè-yu.

11

Cuendá té Păblú ndîhi cuendá cue tée cāchí sá cāháⁿ tnúhu Yá Ndiǒxí te ñá ndàá

¹ Te cuiní-í sá nchòhó cada ndee iní-ndó cùndedóho-ndo tnúhu na cāháⁿ-í, chi cāháⁿ-í dàtná cāháⁿ cue ñáyiú ñá túú cùtnuní iní-xi, te cuéi nása-gá ná cùnduu tnúhu cāháⁿ-í dico chí cádá ndèe iní cùndedóho-ndo. ² Chi yúhú ío ñúhu iní ñáhà-í xii-ndo dàtná ñúhú iní ñáhá mèe Yá Ndiǒxí xii-o, te ní cāháⁿ-í tnúhu Xítóhó Jesucrístú núú-ndó nūu xíǎⁿ ní tnahá tnúhu-ndo ndîhi-gá vitna, te sá dúcáⁿ ñí quide-í te cada iní-ndó sá yúhú cúu-í dàtná ìⁿ tée xìca ndáhú te nchòhó cúu-ndó dàtná ìⁿ xíchí cuéchí, te Xítóhó Jesucrístú cúu-gă dàtná ìⁿ tée tnándaha ndîhi xíchí cuéchí-ǎⁿ. Te ducaⁿ càda iní-ndó chi na sàá nduu te yúhú na càni cuendá ñáhà-í xii-ndo nūú Xítóhó Jesucrístú, te cuu-ndo ñáyiú vá cùndècu tnahí-gá cuéchi-xi. ³ Te yùhú-í sá sàcuíhná dandàhú ñáhá-xí xii-ndo vá cání-gă iní-ndó cànchicúⁿ nihnu-ndo ñí yuhu ñí iní-ndó ìchi Xítóhó Jesucrístú dàtná nchicúⁿ nihnu-ndo vitna. Te yùhú-í ná yáha-ndo dàtná ní yáha tá Èvá, chi sàcuíhná ñí nduu-xi cóo ñí dándàhú ñáhá-xí xii-xi, chi sàcuíhná-ǎⁿ ío váha ní xito-xi nàcuáa ní quide-xi ní dándàhú-xi tá Èvá-áⁿ. ⁴ Te nchòhó, quidé ndèe iní-ndó sàcùndedóho-ndo nchàa tnúhu cāháⁿ cue tée cāháⁿ ingá núú tnúhu cuendá Jësús tnúhu sá ñá túú dānehé ñáhá-ndǐ xii-ndo, te quide ndee tucu iní-ndó ndèdóho-ndo dānehé ñáhá-güedě xii-ndo cuendá ingá espíritú, te ñá díú cuendá Espíritú Yá Ndiǒxí sá ñí ngúndecu ndîhi-ndo dānehé ñáhá-güedě xii-ndo, te quide ndee tucu iní-ndó ndèdóho-ndo dānehé ñáhá-güedě xii-ndo

ìngá núú tnùhu sá càchí-güedé càháⁿ nàcuáa naníhí tàhú-ndó, te ñá díú nàcuáa ndùu tnùhu sá ni sàndáá iní-ndó cuendá naníhí tàhú-ndó càháⁿ-güedé. ⁵ Te cue téé ducaⁿ càháⁿ-áⁿ càchí-güedé sá Yă Ndiöxí ní tendaha ñàha-gá xii-güedé xícá cùu-güedé càháⁿ-güedé tnùhu-gá te ío cùnuu-güedé, dico ñá ndàá sá càháⁿ-güedé tnùhu-gá. Te yúhú cùtnùní iní-í sá cuè téé-áⁿ ñá túú cùnuu-güedé dàtná cùnùu yúhú. ⁶ Te cuèi ñá túú càháⁿ-í dàtná càháⁿ cue téé ío váha sàá díquí-xi dico ío váha cùtnuní iní-í cuendá nchaa sá dácuàha-í, te yúhú sa quide-í nàcuáa cutnùní iní-ndó sã ïo váha cùtnuní iní-í nàcuáa ndùu nchaa tnùhu càháⁿ-í.

⁷ Te cudana te sàni iní-ndó sã yùhú ñá túú ní quide váha-í sá ñí quide-í mée-í dàtná ìⁿ téé ío ndàhú iní-xi, chi ñá túú ní xicáⁿ-í yáhu-í núú-ndó cuendá sá ñí càháⁿ-í tnùhu Yă Ndiöxí tnùhu sá càháⁿ nàcuáa naníhí tàhú-ó núú-ndó. ⁸ Te ní queheⁿ-í díhúⁿ ñí taxi dava-gá cue ñáyiu ndècu ichi Xítóhó Jesucristú, te díhúⁿ-áⁿ ñí dándóñùhu-í ní saaⁿ-í nchaa sá ñí xini ñùhu-í cùtnàhá ní càháⁿ-í tnùhu Xítóhó Jesucristú núú-ndó. ⁹ Te cùtnàhá ní xíndecu ndìhì ñaha-í xii-ndo te áma ní xóo cumání sã xíní ñùhu-í, te ñá túú ñá ní xicáⁿ-í núú ni ìⁿ-ndo. Chi cue ñáyiu xíndecu ichi Xítóhó Jesucristú ndécú dìstrítú Macèdoniá ní quixí-yu ní taxí-yu sá cúmání xii-í, te ñá túú tnàhí ni dàsatú iní ñáhà-í xii-ndo cǎcáⁿ-í núú-ndó nùu ná cúú sã xíní ñùhu-í, te diu-ni ducaⁿ càda-í. ¹⁰ Te diu-ni duha càháⁿ váha-í cuendá-í te ni ìⁿ cue ñáyiu dìstrítú Acăyá vá ñihí-yu tnùhu cúñàhá-yu xii-í cuendá cadí-yu yuhu-í. Te mee Xítóhó Jesucristú nàhá-gă sá ndàá càháⁿ-í dàtná càháⁿ ndáá mée-gă. ¹¹ Te cudana te sàni iní-ndó

sã sã dúhá càháⁿ-í te ñá túú cùu iní ñáhà-í xii-ndo, dico ñáhá chi mee Yă Ndiöxí náhá-gă sá yǔhú ío cùu iní ñáhà-í xii-ndo.

¹² Te nàcuáa-ni ta quide-í véxi te ñiu-ni ducaⁿ càda-í cuendá sá cuè téé cuini cada nínu mee-xi cächí sá ñⁿ-ni cuu ndihí ñaha-güedé xii-í vá ñihí-güedé tnúhu cáháⁿ-güedé cachí-güedé sá ñⁿ-ni chiuⁿ quide ndihí ñaha-güedé xii-í. ¹³ Te cue téé-áⁿ cächí-güedé sá Yă Ndiöxí ní tendaha ñàha-gá xii-güedé xícá cùu-güedé càháⁿ-güedé tnúhu-gá dico ñá ndàá, chi mee-ni dándahú-güedé ñáyiu ndihí tnúhu càháⁿ-güedé, te quide-güedé dàtná quidé cuè téé càháⁿ tnúhu Xítohó Jesucrístú dico ñá ndàá sá cúu-güedé cue téé càháⁿ tnúhu-gá. ¹⁴ Te vá cúñǔhu-o sã dúcáⁿ quide cue téé-áⁿ, chi mee sàcuíhná quidé-xí sã cúu-xí dàtná ñⁿ espíritú xínú cuèchi núú ïo váha càa ndecu Yă Ndiöxí dico ñá ndàá sá xínú cuèchi-xi xíaⁿ. ¹⁵ Te xíaⁿ vá cúñǔhu-o sã cuè téé xínu cuechi núu-xi quide-güedé sá cúu-güedé cue téé quide váha chi ñá ndàá sá quidé váha-güedé chi dándahú-güedé ñáyiu. Te nàcuáa ndùu nchaá sá quidé-güedé te ducaⁿ nàcháhu-güedé núú Yă Ndiöxí.

Té Păblú ío ndòho-dé cuendá sá cúu-dě téé càháⁿ tnúhu Xítohó Jesucrístú

¹⁶ Te yúhú càháⁿ tucu-í dóho-ndo sã vǎ cání iní-ndó sã yǔhú cùu-í ñⁿ téé càháⁿ lùcú càháⁿ duha, te núu ðava-ndo dùcaⁿ sani iní-ndó dico chí cáda ndèe iní cundedóho-ndo tnúhu na càháⁿ-í cuendá ducaⁿ tnàhá-í cada nínu-í mée-í. ¹⁷ Te vitna na càháⁿ-í dàtná càháⁿ ñⁿ téé ñá túú cùtnuní iní-xi, chi tnúhu cáháⁿ-í ñá túú ñⁿ-ni cuu-xi ndihí tnúhu Xítohó Jesucrístú, chi vitna cáháⁿ-í nàcuáa cada

nínu-í méè-í. ¹⁸ Te ío cuéhé ñǎyiu quide nínu mee-xi cuendá nchaa sá ío ñuyíú-a te xǎn nǔu tnàhá-í cuíní-í cada nínu-í méè-í. ¹⁹ Chi cùtnuní sá nchòhó quidé ndée iní-ndó sàcúndedóho-ndo nchàa tnúhu càháⁿ cue tée càháⁿ lùcú càháⁿ duha, te ducaⁿ quide ndee iní-ndó sàcúndedóho-ndo tnúhu càháⁿ-güedé chi càchí-ndó sǎ ïo túha-ndo. ²⁰ Te nchòhó, quide ndee iní-ndó tñi-ndo nchaa tnúhu càháⁿ cue tée quide yica ñaha xii-ndo sá cúnú cuèchi-ndo núú-güedé, te xìcáⁿ-güedé nándi sá xìcáⁿ-güedé núú-ndó, te tàxi tnuní ñáhá-güedé xii-ndo, te quide-güedé sá ïo cùnuu-güedé ndécú ndìhi ñaha-güedé xii-ndo, te càniha-güedé xii-ndo, te cuèi nchaa xǎn quidé ñaha-güedé xii-ndo dico quide ndee-ni iní-ndó. ²¹ Te nchòhó càchí-ndó sǎ cúú-ndǐ cue tée ñá túú ní cùyi cada nándi sá cáda, te ndáa chi ñá túú ìⁿ-ni cuu-ndí ndìhi cue tée ducaⁿ xiquide.

Dico núu cue tée-áⁿ cùyi-güedé quidé nǎnu-güedé méé-güedé, te tnàhá-í cùyi-í ducaⁿ càda-í. Te sá dúhá càháⁿ-í te càháⁿ-í dàtná ìⁿ tée ñá túú cùtnuní iní-xi. ²² Te núu quide cahnu-güedé méé-güedé cuendá sá càháⁿ-güedé tnúhu hèbreú, te yúhú tucu ñu-ni tée càháⁿ tnúhu hèbreú cúu-í, àdi quide cahnu-güedé méé-güedé cuendá sá cúú-güedé cue tée isràél, te yúhú tucu tnàhá-í cúu-í tée isràél, àdi quide cahnu-güedé méé-güedé cuendá sá cúú-güedé ñaní tnáhá ndí Àbrahám, te tnàhá yúhú cúu-í ñaní tnáhá ndí Àbrahám tucu. ²³ Àdi quide cahnu-güedé méé-güedé cuendá sá sání iní-güedé sá díú nǔu Xìtohó Jesucristú xínú cuèchi-güedé, dico yúhú ío-gá xínú cuèchi ndisa-í núú-gǎ. Te sá

dúhá quíde cahnu-í méè-í te cãháⁿ-í dàtná ìⁿ téé ñá túú cùtnuní iní-xi, te yúhú cúu-í ìⁿ téé ío-gá quídé chiùⁿ-gá dàcúúxí cuè téé-áⁿ, te vãi xito ní cuu cãniha ñáyíu xii-í, te vãi xito ní cuu chihí ñahá-yu vecaá xii-í, te vãi xito ní cuu cãcu cãcu cahni ñaha ñáyíu xii-í. ²⁴ Te cue ñáyíu isràél ní canihá-yu xii-í úhúⁿ xito, te ndi tnahá ìⁿ ìⁿ xito ní canihá-yu ní dáquẽe-yu ócò sáhúⁿ cúmí ñì sàtà-í. ²⁵ Te úní xito ní caniha tùcu ñáyíu xii-í ndihí carrútí, te ìⁿ xito ní sáha yúú ñáhã-yu xii-í, te ní cuu úní xito quẽe naa bàrcú xití ndute òré sácùhuⁿ-í, te ìⁿ xito ío ní ndoho-í ní xíndecu-í ìⁿ nduu ìⁿ niú núú ndute làmár. ²⁶ Te ío titní xichi ní cuu xìca cuu-í, te dava xichi ní cãcu cuido ñaha ndùte ñuhu xii-í, te dava xichi ní cãcu duhu ñàdúhú nchaa ndachìuⁿ-í, te dava xichi ní cãcu cada ñaha cuè ñáyíu cùu ndi mee-í ìⁿ sá cádá ñahá-yu xii-í, te ñi-ni ducaⁿ ñi cãcu cada ñaha tùcu cue ñáyíu ñá túú cùu ndi mee-í ìⁿ sá cádá ñahá-yu xii-í ní cùu, te cuẽi xití ñuú te cuẽi xití yucu cãcu cãcu cada ñaha ñáyíu xii-í ìⁿ sá cádá ñahá-yu, te ñi-ni ducaⁿ cãcu cãcu quiní-í tnúndòho oré ñúhù-í bàrcú cuáháⁿ núú ndute làmár. Te cue ñáyíu cãchí sá ndécú ìchi Xítóhó Jesucrìstú te ñá ndàá cãcu cãcu cada ñahá-yu xii-í ìⁿ sá cádá ñahá-yu. ²⁷ Te ío ndòho-í cuèndá chiùⁿ quíde-í chi ío xàú-í, te ní cuu vãi xito ñá túú xidí-í, te titní xito ní cuu xihí víhì-í docó, te titní xito ní cuu yìchí-í ndute, te titní xito ní cuu ñá túú tnahí ná xéxì-í cuèndá chiùⁿ quíde-í, te titní xito ní cuu ndòho-í sá víxiⁿ, te titní xito ní cuu ñá túú ñihí-í dóó cuihnu-í.

²⁸ Te ñá ñíú-ní xiãⁿ chi ìⁿ nduu ìⁿ nduu ío sàni iní-í cuèndá nchaa ñáyíu ndècu ichi Xítóhó Jesucrìstú xíndecu nchaa xichi. ²⁹ Te ndèda-ni càa ñáyíu

ñá túú ñihí ndéé cùndecu ichi Xítóhó Jesucrístú, te ío cùndahú iní-í chi sànuu sá tnàhá-í ñá túú ñihí ndéé-í cundecu-í ichi-gá sá dúcáⁿ quidé-yu. Te núu ìⁿ ñáyiú quidé-yu sá ìⁿ nchohó ñáyiú ndècu ichi Xítóhó Jesucrístú quidé-ndó ìⁿ sá ñá túú tàú-ndó càda-ndo te vá cúú vǎha iní-í chi cudèèⁿ-í. ³⁰ Te núu xìni ñuhu-xi sá cádá càhnu-í mée-í, te cuu ducaⁿ càda-í te cáháⁿ-í mee-ni cuendá nchaa sá quidé nàcuáa ñá túú ñihí ndéé yìquì cuñú-í. ³¹ Te Dútú Ndiöxí Yaá cúú Tǎtá Xítóhó Jesucrístú náhá-gǎ sá yǎhú càháⁿ ndáá-í núú-ndó, te ñu-gá tàú-gá cachí-ó sǎ ìo càhnu cuu-gá ñi caa ñi quíhíⁿ. ³² Te cútnàhá ní xíndecu-í ñuú Dàmascú te téé cùu gobiernú téé cùndihí téé yìndaha ñáyiú nàni Aretás ní taxi ndecu-dé cue téé ní xíndedí yuyèhe sá ñúhú dòco ñuú cuendá òré quee-í te tñi ñaha-güedě xii-í ní cùu. ³³ Dico yúhú ní queè-í ìⁿ xití tídihi, te cue ñáyiú cùndihí ñaha xii-í ní queñuhu ñàhá-yu ndàa ventaná nchì yìquì naha sǎ ñúhú dòco ñuú-án, te ducaⁿ te ní cácu-í ñá túú ní ndàcu-güedé tñi ñaha-güedě xii-í.

12

Té Pǎblú càháⁿ-dé sá ìo vii càa sá ñi dánèhé núú ñàhá Xítóhó Jesucrístú xii-dé

¹ Te ñá túú ndéé nándihí-xi sá càháⁿ váha-o cuendá mée-ó, dico vitna xìni ñuhu-xi ducaⁿ cada-í chi cáháⁿ-í nàcuáa ní quide ñaha Xítóhó Jesucrístú xii-í, chi ní quide-gá sá ñi cutnùní iní-í nàcuáa ndùu tñuhu-gá, te vǎi núú sǎ ñi dánèhé núú ñàhá-gǎ xii-í. ² Te yúhú xìní-í ìⁿ téé sàndáá iní ñàhá xì Xítóhó Jesucrístú, te sa ní cuu úxícúmí cuǎ sǎ tée-án

nĩ sáá-dé ndéé andiũ cùu uní, te ñá túú xìní-í te núu ndihĩ yiquĩ cùñú-dé ní sáá-dé àdi ñáhá, chi ñndì díí-ni Yá Ndiõxí náhá-gã te núu nása càa-dé ní sáá-dé. ³ Te yúhú càháⁿ ndáá-í cuendá téé-áⁿ, dico dàtná ní cachí-í sá ñá túú xìní-í te núu ndihĩ yiquĩ cùñú-dé ní sáá-dé andiũ àdi ñáhá, chi mee Yá Ndiõxí náhá-gã te núu nása càa-dé ní sáá-dé. ⁴ Te téé-áⁿ nĩ sáá-dé ññ xichi núú ïo váha càa andiũ, te yacáⁿ ní xíndedóho-dé tnúhu mee-ni sã cúú-xí cuendá méé-dě, te tnúhu-áⁿ vã cúú tnàhí cáháⁿ-dé núú nì ññ ñáyiu. ⁵ Te yúhú quidé ññu-í téé-áⁿ, dico mee-ĩ ñá túú càháⁿ váha-í cuendá-í cuendá cada nínu-í méè-í, chi càháⁿ-ni mee-ni cuendá nchaa sá quidé nàcuáa ñá túú ñihí ndéé yiquĩ cuñú-í. ⁶ Te núu dicó yúhú cuíní-í te cuu cáháⁿ váha-í cuendá-í cuendá cada nínu-í méè-í, te núu ducaⁿ na càháⁿ-í te ñá túú cùu-xi ññ tnúhu neñúú cáháⁿ-í, chi cùu-xi ññ sá càháⁿ ndáá-í te núu na càháⁿ-í. Dico vá dúcáⁿ càda-í chi cuíní-í sá nchòhó cada cuendá-ndó nàcuáa ndùu tnúhu càháⁿ-í ndihĩ nàcuáa quide-í, te ducaⁿ mèe-ndo cáháⁿ-ndó te núu ná téé cùu-í, te ñá díú sã yúhú cáháⁿ váha-í cuendá méè-í cuendá nchòhó cachí-ndó sã ïo cùnuu-í.

⁷ Te sá nĩ dánèhé núú ñáhá Xìtohó Jesucrìstú xii-í cúú-xí sã xidó ío váha, te cuendá sá vã cadá càhnu-í méè-í nùu xíáⁿ Xìtohó Jesucrìstú ní quide-gá duha ndòho yiquĩ cuñú-í vitna. Te sá dúcáⁿ quide ñaha-gá xii-í te xíáⁿ sácúíhná nĩ ñihí-xi ichi càhnu dandoho ñaha-xi xii-í. ⁸ Te ní cuu úní xito càháⁿ ndàhú-í núú Xìtohó Jesucrìstú sá ná cadá-gã nàcuáa vá ndóhó-gã yiquĩ cùñú-í. ⁹ Dico mee-gã càchí-gá xii-í: “Yúhú ío cùndahú iní ñáhà-í xii-n chìndee ñaha-í, te ñá túú ñã cúmăní xii-n, te cùtnuní sá ïo-gá chíndèe-í cue ñáyiu ñá túú ñihí ndéé cùndecu”, duha ní cachí-gá xii-í.

Te xíãⁿ nõu yúhú ío cùdǎí ìní-í sá ñà túú ñìhí ndéè-í ndécù-í, chí diu cuendá xíãⁿ Xítóhó Jesucristú ñá túú dàña nihnu ñaha-gá xii-í chíndèe ñaha-gá. ¹⁰ Te xíãⁿ nõu cùdǎí ìní-í sá dúhá ñá túú ñìhí ndéè-í ndécù-í, te cùdǎí tucu iní-í cuendá nchaa tnúhu cuèhé tnúhu duha cãháⁿ ñáyiú cuendá-í, te cùdǎí ìní-í cuendá nchaa sá ndóhò-í, te cùdǎí tucu iní-í cuendá sá quidé ñàha ñáyiú xii-í, te cùdǎí tucu iní-í cuendá nchaa dava-gá sá ndóhò-í cuendá Xítóhó Jesucristú. Te òré ñá túú ñìhí ndéè-í te Xítóhó Jesucristú chíndèe ñaha-gá xii-í ñìhí ndéè-í.

Té Pãblú ío sàni iní-dé cuendá cue ñáyiú xĩndecu ichi Xítóhó Jesucristú ndécú ñùú Còrintú

¹¹ Te cùu-í dàtná ìⁿ tée ñá túú cùtnuní iní-xi sá dúhá cãháⁿ váha-í cuendá-í, te ducaⁿ quide-í chí mee-ndo quide-ndo sá dúcãⁿ cãháⁿ-í, dico mee-ndo tàú-ndó cãháⁿ váha-ndo cuendá-í ní cùu. Te dava cue tée ío quide cahnu-güedé mée-güedé, te cãhí-güedé sá Xítóhó Jesucristú ní táuchíúⁿ-gã sá cãháⁿ-güedé tnúhu-gá, dico yúhú cúnùu-gá-í dàcúxí cuè tée-áⁿ cuèi ñá túú vèdana ná cùu-í ndécù-í ñuyíú-a. ¹² Te cùtnàhá ní xĩndecu ndìhi ñaha-í xii-ndo ïo ní quide cãhnu iní-í nãndi sá ñí yáha-í ní quide-í chiuⁿ Xítóhó Jesucristú sá cúu-xí-ndó. Te ní chindee ñàha-gá xii-í ní quide-í titní núú sã vã yõ tnàhí ndàcu cada te ní cuñúhu-ndo, te sá dúcãⁿ ñí chindee ñàha-gá xii-í ní cutnùní iní-ndó sã yúhú cúu ndisa-í ìⁿ tée ní cachí Xítóhó Jesucristú sá cãháⁿ-í tnúhu-gá. ¹³ Te yúhú ìⁿ-ni quide ndìhi ñaha-í xii-ndo ndìhi nchaa dava-gá cue ñáyiú ndècu ichi Xítóhó Jesucristú, te dìcò-ni sá yúhú ñá túú ní cuìní-í taxi-ndo sã xíní

ñùhu-í dàtná ní quide-í dava-gá-yu. Te núu ñá túú ní quide váha-í sá dúcáⁿ ñí quide-í ñá túú ní cuìní-í chindee ñàha-ndo te chí cádá càhnu iní ñáhá xì-í.

¹⁴ Te vitna sa ndècu túha-í sá quixì-í núú ndécú-ndó, te sá quixí còto ñaha tucu-í xii-ndo cùu-xi xito cuu úní sá quixì-í, te cuìní-í sá vǎ dándìhú-ndó ìní-ndó ndùcu-ndo sá táxí-ndó cùu xii-í, chí ñá díú xǎⁿ ndèé iní-í chí mee-ndo ndèé iní-í quixì-í. Te duha càháⁿ-í chí nchòhó xìní-ndó sǎ cuè téé cùu tátá sǎñaha-güedé sá cúú-xí cuè déhe-güedé te ñá díú cuè déhe-güedé sǎñaha-güedé sá cúú-xí mèe-güedé. ¹⁵ Te yúhú ío váha cùu iní-í dandòñuhu-í sá ndécú ndìhi-í nàcuáa ndacu-í chindee ñàha-í xii-ndo cùndecu váha-ndo sǎ cúú-xí Yǎ Ndiǒxí chí ío cùdí ìní-í, te cuèi na cùu-í sá cuendá-ndó, chí ío cùu iní ñáhà-í xii-ndo, te sá dúcáⁿ cùu iní ñáhà-í xii-ndo, te sànuu sá nchòhó ñá túú cùu iní ñáhá càvihi-ndo xii-í.

¹⁶ Te nàha-ndo sá ñà túú ní dándìhú-í iní-ndó ñǎ taxi-ndo cùu xii-í, dico dava-ndo càchí-ndó sǎ ío váha ní xito-í nàcuáa ní quide-í nàcuáa ní dándàhú ñáhà-í xii-ndo. ¹⁷ Te chí càháⁿ te núu yúhú ní dándàhú ñáhà-í xii-ndo ndìhi cue téé ní tendaha-í ní quixì coto ñaha xii-ndo. ¹⁸ Te ní càháⁿ ndàhú-í núú tǎ Títú ndìhi núú ìngá tucu téé ndècu ndìhi-o ichi Xítóhó Jesucrìstú ní quixi coto ñaha-güedé xii-ndo. Te nchòhó cùtnùní iní-ndó sǎ tǎ Títú ñá túú ní dándàhú ñáhà-dě xii-ndo, te ducaⁿ chí ìⁿ-ni sàni iní-ndí te ìⁿ-ni quide-ndí.

¹⁹ Te cudana te sàni iní-ndó sǎ sà dúhá càháⁿ-ndí te tàunihnu-ndí méé-ndí, dico ñá díú dùcaⁿ quee-xi tnúhu càháⁿ-ndí, chí càháⁿ-ndí nàcuáa tàú-xi càháⁿ-ndí chí ndècu ndìhi-ndí Xítóhó Jesucrìstú,

te mee Yă Ndiõxí náhá ndăá-gá nàcuáa ndùu tnúhu cãháⁿ-ndí, te nchaa sá cãháⁿ-ndí cúú-xí cuendá nchòhó cue ñáyiú ío cùu iní-ndí, te cãháⁿ-ndí nàcuáa cundecu váha-ndo ìchi Xítóhó Jesucristú. ²⁰ Te ío sàni iní-í cuendá-ndó chi na cuáháⁿ te òré quixi-í quixi coto ñaha-í xii-ndo, te ñá túú quide-ndo nacuáa cuu váha iní-í, te sá dúcáⁿ te yúhú cáháⁿ-í nàcuáa vá cúú vãha iní-ndó, te ducaⁿ ïo sàni iní-í cuendá-ndó chi na cuáháⁿ òré quexìo-í te nàá-ndó, àdi ndecu-ndo ichi cuédú íní, àdi cudééⁿ nùú tnáhá-ndó, àdi ñá túú cùu ìⁿnuu-ndo ndecu-ndo, àdi cáháⁿ cuèhé-ndó cuendá tnàha ñáyiú-ndo nùú chítú nùú tàcá, àdi satnuhu tnaha-ndo, àdi quide cahnu-ndo mee-ndo, àdi quide dusaⁿ dóho tnàha-ndo. ²¹ Te ío sàni iní-í cuendá-ndó chi na cuáháⁿ òré quixi-í, te Yă Ndiõxí cada-gá te cucahaⁿ núù-í sá cuendá-ndó, te ío ndíhú iní-í cuendá-ndó te núu vátá dáñá-gã-ndó nchàa sá cuèhé sá dúhá ñí ngüíta-ndo quide-ndo ndéé sanduu, te vài-ndo ní ngüíta-ndo dùcaⁿ quide-ndo, chi ndècu-ndo ichi díí íní te nándi-gá nchaa sá cuèhé sá dúhá quide-ndo, te ducaⁿ ïo ndíhú iní-í te núu vátá dáñá-gã-ndó nchàa xíãⁿ.

13

Tnúhu ndéé núú ñí ndíhi-ná

¹ Te sá quixi-í vitna núú ndécú-ndó cùu-xi xito cuu úní sá quixí còto ñaha-í xii-ndo. Te cãchí tnúhu-í xii-ndo sã òré cundáá cuéchi-ndo te canehe núú úú àdi úní ñáyiú cáháⁿ ndáá nàcuáa ndùu cuéchi-ndo. ² Te yúhú sa ní cáháⁿ-í dóho-ndo cùtnáhá ní quixi-í ní quixi coto ñaha-í xii-ndo xito cuu úú, te ñiu-ni ducaⁿ cãháⁿ tucu-í dóho-ndo vitna vátá

quíxí tùcu-gá-í quixi coto ñaha-ĩ xii-ndo. Te nchòhó ñáyiu ní cunduu ñí ngúíta quide nchaa sá cuèhé sá dúhá, tenàá ñáhà-í xii-ndo òré quexìo-í te núu vátá dáñá-gã-ndó nchaa sá cuèhé sá dúhá quide-ndo te tnàhá nchaa dava-gã-ndó tènàá ñáhà-í xii-ndo. ³ Te nchòhó cuìní-ndó quìní-ndó nõu ndáá sá quidè-í núu Xítohó Jesucristú càháⁿ-í yuhu-gá, dico dàvá-áⁿ cutnùní ndáá iní-ndó. Te Xítohó Jesucristú quidé-gã nàcuáa cutnùní iní-ndó sã ïo càhnu cuu-gá te ñá túú quide-gá dàtná quidé ìⁿ ñáyiu ñá túú ñìhí ndéé cùndecu. ⁴ Te Xítohó Jesucristú ní ndoho-gá dàtná ìⁿ ñáyiu ñá túú ñìhí ndéé cùndecu, chi ní sahnì ñaha-güedë xii-gá núu cùrúxí dico mee Yã Ndiõxí ní quide-gá ní ñìhí ndéé Xítohó Jesucristú ní ndoto-gã ndécú-gã vitna, te tnàhá nchúhú tucu ducaⁿ yãha-ndí ñá túú ñìhí ndéé-ndí cundecu-ndí, dico mee Yã Ndiõxí chíndèe ñaha-gá xii-ndí ñìhí ndéé-ndí ndécú-ndí cuèndá sá ndécú ndìhi-ndí Xítohó Jesucristú, te xíãⁿ nõu ndàcu-ndí quidé-ndí nàcuáa tàú-xi cunduu sá cúú-xí-ndó.

⁵ Te chí cádá cuèndá váha te núu ndisa sá sàndáá iní-ndó tnùhu Xítohó Jesucristú, te núu ndáá sá ndécú-ndó ìchi-gá te cùtnuní iní-ndó sã ndécú-ndó ndìhi-gá. ⁶ Te cuìní-ndí sá nchòhó cutnùní ndáá iní-ndó sã nchùhú ndécú ndìhi ndisa-ndí Xítohó Jesucristú. ⁷ Te nchúhú càháⁿ ndìhi-ndí Yã Ndiõxí cuèndá-ndó cuèndá sá vã cádá-ndó ñí ìⁿ sá cuèhé sá dúhá, te vã cánì iní-ndó sã sà dúcáⁿ càháⁿ ndìhi-ndí-gá cuèndá-ndó, te cuìní-ndí sá nchòhó cutnùní iní-ndó sã nchùhú ío ndècu yíñuhu-ndí núú-gã, te ñáhá chi càháⁿ ndìhi-ndí-gá cuèndá-ndó chi cuìní-ndí sá nchòhó

cada váha-ndo cùndecu-ndo cuéi sàni iní-ndó sǎ nchùhú cúú-ndǐ cue téé ñá túú ndècu yǐñuhu núú-gǎ. ⁸ Te nchùhú mee-ni càháⁿ váha-ndǐ cuendá tnúhu ndáá tnúhu Yá Ndiǒxí, te ñá túú càháⁿ-ndǐ ìⁿ tnúhu sá ñà túú tàú-xi cáháⁿ-ndǐ cuendá tnúhu-áⁿ. ⁹ Te cùdǐ ìní-ndǐ sá ñà túú-gǎ xíní ñùhu-xi cada-ndǐ nàcuáa níhí ndéé-ndǐ tenáá ñáhá-ndǐ xii-ndo cǎháⁿ-ndǐ dóho-ndo, chi nchòhó sa ní níhí ndéé-ndó ndècu-ndo ichi-gǎ. Te nchùhú càháⁿ ndihí-ndǐ Yǎ Ndiǒxí cuendá-ndó cuendá sá nchòhó cundáá-ndó cùndecu-ndo ñá túú-gǎ ná cumání-ndó nǔú-gǎ. ¹⁰ Te xǐǎⁿ nǔu duha ndùu nchaa tnúhu tèe-í núú tütú-a daquixi-í ndaha-ndo vitna ñá túú ndècu ndihí ñaha-í xii-ndo, cuendá sá òré ná cùndecu ndihí ñaha-í xii-ndo te vá ïo níhí cáháⁿ-í dóho-ndo nàcuáa ndùu tnúhu ndee ìní ní taxi Xítóhó Jesucristú ndécú ndihí-í, chi ní taxi-gǎ tnúhu ndee ìní xii-í nàcuáa canu ichi ñaha-í xii-ndo cuíta cuehnu nihnu-ndo ichi-gǎ quihíⁿ, te ñá díú cuendá sá cánùichi ñaha-í xii-ndo cuíta nihnu-ndo.

¹¹ Te vitna nchaa nchòhó ñáyiu ndècu ndihí-ndǐ ichi Xítóhó Jesucristú ío quide ndee iní ñáhá-ndǐ xii-ndo, te ío chí ndúcú nàcuáa cada-ndo cùndáá-ndó nǔú Yǎ Ndiǒxí cuendá sá ñà túú tnáhí-gǎ ná cùmání-ndó nǔú-gǎ, te ndee ndèe cada iní-ndó cùndecu-ndo, te chí cúú ìⁿnuu cundecu ndihí tnaha, te ducaⁿ te Yá Ndiǒxí cundecu ndihí ñaha-gǎ xii-ndo chí ío cùu iní ñáhá-gǎ xii-o, te díu-gǎ quidé-gǎ ío váha cùu iní-ó ndècu-o. ¹² Te ndihí tnúhu yǐñuhu chí cádá ndèe iní tnáhá. ¹³ Te nchaa ñáyiu cùu cuendá Yǎ Ndiǒxí ndécú ìha quide ndee iní ñáhǎ-yu xii-ndo.

¹⁴ Te xicáⁿ táhú-ndǐ núú Xítóhó Jesucristú sá ïo na

chìndee chitúu ñaha-gă xii-ndo. Te mee Yă Ndiǒxí ná cádá-gă nàcuáa cutnùní iní-ndó sǎ ïo cùu iní ñáhá-gă xii-ndo, te Espíritú-gá cundee cùu cahnu iní-ndó cùndecu-ndo. Te ducaⁿ na cùnduu. Te ío chí cádá ndèe iní-nǎ vitna.

Tnúhu ní cáháⁿ yá ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939